


INFO



Informativni časopis Općine Novi Grad Sarajevo | Maj 2022. godina | Broj 30

Na brdu Žuč otvoreno prvo sportsko strelište u Sarajevu



Usvojen Program investicionog održavanja lokalnih cesta, izdvojeno 1,6 miliona KM

Počela izgradnja pješačke staze u podnožju brda Mojnilo

Zasađeno 1.100 novih stabala





CENTAR SAFET ZAJKO

REKREACIJA, SPORT I EDUKACIJA



SADRŽAJ:

	Općinsko vijeće.....	3
	Kabinet načelnika.....	11
	Privreda.....	16
	Infrastruktura.....	16
	Obrazovanje.....	38
	Sport.....	40
	Kultura.....	42
	Obilježavanja.....	49
	Ostale vijesti.....	56

TELEFONI ZA HITNE INTERVENCIJE:

HIGIJENSKI SERVIS
+ 387 61 22 99 40

DEŽURNI INSPEKTOR
+ 387 61 22 99 49

IMPRESUM:

IZDAVAČ:

Općina Novi Grad Sarajevo
Tel.+387 33 291 100, 291-313
E-mail: ngsa@bih.net.ba
www.novigradsarajevo.ba

AUTOR I UREDNIK:

Amina Vatreš-Nezirević

FOTOGRAFIJA I DIZAJN

Samir Kadić i Nihad Spahić

VAŽNIJI TELEFONI I E-MAIL ADRESE

Služba za poslove Općinskog vijeća

033 291-130, fax. 033 291-271
vijece@novigradsarajevo.ba

Služba kabineta Općinskog načelnika

033 291-100 033 291-103; fax. 033 291-278
infonovigrad@novigradsarajevo.ba
ngsa@bih.net.ba
aminapress@novigradsarajevo.ba

Služba za privredu i lokalni ekonomski razvoj

033 291-122
privreda@novigradsarajevo.ba

Služba za urbanizam, imovinskopravne, geodetske poslove i katastar nekretnina

033 291-120; fax. 033 291-224
urbanizam@novigradsarajevo.ba
033 291-279
imovinska@novigradsarajevo.ba

Služba za opću upravu

033 291-233;
opcauprava@novigradsarajevo.ba
maticniured@novigradsarajevo.ba
cern@novigradsarajevo.ba

Služba za obrazovanje, kulturu i sport

033 291 117
033 291 281; fax. 291 170
obrazovanjeirazvoj@novigradsarajevo.ba

Služba za boračka pitanja, rad, socijalna pitanja i zdravstvo

291-237; fax.291-164
boracka@novigradsarajevo.ba
033 291-173; fax. 291-173
radisocijalnapitanja@novigradsarajevo.ba
291-306; fax.291-281

Služba za investicije i infrastrukturu

033 291-116
investicijeikomunalno@novigradsarajevo.ba

Služba za finansije

291-234; fax.291-319
finansije@novigradsarajevo.ba
ngsafin@bih.net.ba

Služba za zajedničke poslove

033 291-107
sacira@novigradsarajevo.ba

Služba civilne zaštite

033 291-114
cz@novigradsarajevo.ba

Služba za lokalnu samoupravu

033 291-344
mz@novigradsarajevo.ba

Služba za inspeksijske poslove

inspekcija@novigradsarajevo.ba

Pravobranilaštvo Općine Novi Grad Sarajevo

033 291-162
pravobranilastvo@novigradsarajevo.ba



Uvojen Nacrt Strategije razvoja Općine Novi Grad Sarajevo za period 2021 - 2027. godina



Općinsko vijeće Novi Grad Sarajevo održalo je 24. februara, 12. sjednicu Vijeća na kojoj je usvojen Nacrt Strategije razvoja Općine Novi Grad Sarajevo za period 2021-2027. godina. Nacrt Strategije narednih 30 dana bit će na raspolaganju za javne konsultacije građanima i drugim zainteresiranim subjektima, nakon čega će konačni strateški dokument biti dostavljen Vijeću na usvajanje.

Prva Strategija razvoja Općine Novi Grad Sarajevo usvojena je 2014. godine, i obuhvatala je period 2014 - 2020. godina, a realizirana je sa više od 90 procenata. Prvi cilj te Strategije bio je konkurentna privreda koja generiše nova kvalitetna radna mjesta, a vizija da novogradska općina bude najdinamičnija općina u Kantonu Sarajevo. Oba cilja su ostvarena, što potvrđuju statistički podaci koji govore da Općina Novi Grad Sarajevo ima najveći broj zaposlenih u FBiH, da je broj predškolske djece i djece upisane u prvi razred osnovnog obrazovanja veći za 20%, da je zadržan kontinuitet rasta broja stanovništva, kao i nivo rasta budžeta, a prema rangu razvijenosti općina u FBiH, Općina Novi Grad je 2010. godine bila 27. općina u FBiH, dok je 2020. godine na petom mjestu. To je primjer da se i u Bosni i Hercegovini, i u ovako teškoj političkoj i ekonomskoj situaciji, može ostvariti značajan razvoj i trendovi koji ohrabruju ljude da ovdje žive i planiraju svoju porodicu i svoj život.

Upravo nova razvojna Strategija Općine putokaz je budućeg rada i razvoja ove lokalne zajednice u narednih šest godina. Na izradi Strategije radio je tim eksperata Ekonomskog instituta u Sarajevu, predstavnici službi Jedininstvenog općinskog organa Općine Novi Grad Sarajevo, Općinskog vijeća i ustanova. Nacrt strateškog dokumenta prezentirao



je prof. dr. Muamer Halilbašić, direktor Ekonomskog instituta u Sarajevu. On je kazao da bi ovaj okvirni dokument trebao biti vodilja kada su u pitanju ključni procesi u razvoju Općine Novi Grad Sarajevo do 2027. godine.

Istakao je da je vizija da Općina Novi Grad bude lider u Bosni i Hercegovini u procesima osiguranja povoljnog poslovnog ambijenta, prosperitetnog i ugodnijeg življenja. Na temelju vizije razvoja Općine, definirana su tri strateška cilja, a to su: unaprijediti konkurentnost privrede i podržati otvaranje novih, kvalitetnih radnih mjesta, unaprijediti inkluzivan društveni sektor i javne usluge zasnovane na efikasnoj, otvorenoj i odgovornoj upravi, te unaprijediti kvalitet okoliša i podršku efikasnoj komunalnoj infrastrukturi u funkciji održivog razvoja i

podizanja kvaliteta života stanovnika općine Novi Grad Sarajevo. Kroz ova tri strateška cilja obuhvaćen je razvoj i ono od čega se živi, te ono što građani trebaju za lagodniji život, ali i ekološki dio koji nam sve više treba.

„Ono što nam stvara dobar osnov za iskorak u narednom periodu je činjenica da imamo oko 50% budžeta koji se izdvaja za kapitalna ulaganja, troškovi administracije čine 35% budžeta, tako da dvije trećine budžeta ostaje za projekte razvojnog karaktera. Zdrava struktura budžeta, odnosno značajna sredstva koja su na raspolaganju, određeno akumulirano iskustvo, pozicija Općine, činjenica da broj stanovnika raste, su temelji na kojima treba praviti iskorak u budućem razvoju općine u periodu do 2027. godine“, zaključio je prof. dr. Halilagić.

Pristup školskim objektima

Na dnevnom redu sjednice bila je i informacija o realizaciji zaključaka o sigurnosti učenika u saobraćaju na putu od kuće do škole na području općine Novi Grad Sarajevo. O radovima koji se izvode u blizini škole „Aleksa Šantić“ informisao je općinski načelnik Semir Efendić. On je kazao da su u toku završni radovi na izgradnji pristupnih puteva prema školi, te da je usvojen i program za osiguranje boljeg pristupa svim školama u novogradskoj općini, a da je u proceduri i priprema za javnu nabavku. Također, Služba za inspeksijske poslove vrši inspeksijski nadzor ograda koje imaju karakter građevinskih objekata, a koje nemaju dozvole, kako bi se nakon toga krenulo u eksproprijaciju i proširenje saobraćajnica u skladu sa regulacionim planom. U toku je izgradnja parkinga za nastavnike škole, kako bi se rasteretio postojeći za roditelje koji dovoze svoju djecu u školu.

Načelnik Efendić pozvao je nadležnu Komisiju da prema Općinskom vijeću pokrene proceduru, a potom i prema Skupštini KS, da se dijelu ulice u kojoj je poginuo učenik škole „Aleksa Šantić“, dodijeli ime po rahmetli Aliju Bečiću. „To bi bio jedan mali, minimalni naš doprinos u sjećanju na njegov mladi život koji je izgubljen“, kazao je načelnik.

Na sjednici je istaknut problem kretanja učenika prema školi „Umihana Čuvidina“ zbog radova koji se izvode u blizini škole, u ulici Safeta Zajke. Istaknuto je da je Općina nekoliko puta tražila od izvođača radova i investitora Direkcije za puteve KS, koja je ugovorila izgradnju ceste, da osiguraju uslove prilaska školi. U vezi sa tom problematikom Vijeće je usvojilo zaključak da se uputi dopis prema Direkciji za puteve KS i izvođaču radova firmi „Euro - Asfalt“, koji su po zakonu dužni da osiguraju svako gradilište, da osiguraju odvijanje pješackog i motornog saobraćaja u vrijeme izvođenja radova.

Vijeće je usvojilo izvještaj o realizaciji projekata humanitarnog karaktera za NVO po javnom pozivu u 2021. godini i izvještaj o realizaciji projekata NVO po javnom pozivu u 2021. godini, te Lokalni akcioni plan za re/integraciju bh. državljana, koji se vraćaju po osnovu sporazuma po redmisiji na području općine Novi Grad za period 2021 - 2024. godina.



Edita Šandal



Prof. dr. Muamer Halibašić



Toni Vukadin



Maja Muftić - Dedović

Vijeću je prezentirana informacija o radu OV, radnih tjela i Službe za poslove Općinskog vijeća u 2021. godini, informacija o dodjeli pomoći u participaciji liječenja teško oboljelih osoba i podršci bračnim parovima za vantjelesnu oplodnju sa područja ove lokalne zajednice u 2021. godini, te informacija o realizaciji programa dodjele jednokratne novčane pomoći za opremanje novorođenog djeteta porodicama sa troje i više djece.

Usvojen je prijedlog Komisije za obilježavanje značajnih događaja i ličnosti za promjenu imena OŠ „Anex“ u OŠ „Šukrija Pandžo“, kao i Nacrta Odluke o finansiranju nevladinih i neprofitnih udruženja koja okupljaju boračku populaciju, i upućen u javnu raspravu u trajanju od 30 dana.



SASTANAK PREDSEDVAJUĆEG MIRZE SELIMBEGOVIĆA SA ADMIROM KAPOM

Iskazana podrška projektima edukacije o značaju kupovine domaćih proizvoda



Predsjedavajući Općinskog vijeća Novi Grad Sarajevo Mirza Selimbegović i dopredsjedavajuća Maja Muftić - Dedović održali su sastanak sa Admirom Kapom, predsjednikom Udruženja građana „Kupujmo i koristimo domaće“.

Razgovarali su o značaju kupovine i konzumiranja domaćih proizvoda i razvijanja svijesti kod građana o tome, s posebnim akcentom na mlađu populaciju, te uspostavi saradnje između Udruženja „Kupujmo i koristimo domaće“ i Općine Novi Grad Sarajevo u smislu uključivanja učenika novogradskih škola u projekat edukacije o značaju kupovine proizvoda proizvedenih u Bosni i Hercegovini.

Predsjedavajući Selimbegović istakao je da su ekonomske i finansijske posljedice izazvane globalnom pandemijom koronavirusa pokazale ogroman značaj domaće proizvodnje kao i važnosti mnogo veće upotrebe domaćih proizvoda kako bi cijela zemlja imala ekonomsku korist. U tom smislu iskazana je spremnost podrške Općine Novi Grad Sarajevo pri realizaciji projekta uključivanja što većeg broja novogradskih đaka u edukativni projekat „Kupujmo i koristimo domaće“. Predsjedavajući Selimbegović je naglasio da je projekat vrlo značajan s aspekta razvijanja svijesti kod mladih ljudi koji će kasnije kroz život znati šta znači konzumiranje naših bh. proizvoda.

„Nastojaćemo da u skladu sa našim mogućnostima damo podršku ovom projektu kroz koji se podiže svijest kod mladih ljudi o kupovini i korištenju domaćih proizvoda, kao i drugim projektima gdje se otvara prostor da mi kao Općina možemo dati svoj doprinos za

razvoj privrede i domaće proizvodnje“, rekao je predsjedavajući Selimbegović.

Admir Kapo zahvalio je predsjedavajućem na izdvojenom vremenu istakavši da je u proteklih nekoliko godina Udruženje realiziralo devet nacionalnih kampanja, te da ove godine planiraju da organiziraju 10. jubilarnu kampanju.

„Radimo jedan vrlo značajan projekat koji bi u nekoj budućnosti trebao postići konkretne rezultate, a to je projekat edukacije učenika o bh. privredi. To je projekat koji smo od 2012. godine konstantno radili, a koji je zbog korone prekinut 2020. godine. Ponovo se vraćamo da učenike starijih razreda vodimo u proizvodne pogone naših domaćih firmi. To je projekat koji doprinosi dugoročnim efektima. Djeca kada zauzmu kurs oko kupovine domaćih proizvoda i korištenja domaćih usluga, u budućnosti će biti svjesne generacije i kupovina domaćih proizvoda će se podrazumijevati“, rekao je Kapo i dodao:

Na sastanku je bilo riječi i o značaju održavanja sajмова, te je iskazana želja za organiziranjem istog u narednom periodu. Time bi se prezentirali mali poljoprivredni proizvođači. To su većinom male porodične firme koje imaju ograničen kapacitet proizvodnje i nemaju mogućnost plasmana proizvoda u tržišnim centrima. Njima su sajmovi dobra prilika da ono što proizvedu i prodaju, te na osnovu toga mogu planirati narednu proizvodnju, rečeno je tokom sastanka.

Usvojen Program investicionog održavanja lokalnih cesta, izdvojeno 1,6 miliona KM



Općinsko vijeće Novi Grad Sarajevo održalo je 31. marta, 13. radnu sjednicu, na kojoj je usvojilo osamnaest razmatranih tačaka dnevnog reda. Između ostalog, usvojen je Program rekonstrukcije, održavanja, popravke ulica, lokalnih puteva, trgova, parkinga i mostova na području Općine Novi Grad za 2022. godinu, za čiju realizaciju je u Općinskom budžetu planiran iznos od 1,6 miliona konvertibilnih maraka.

Od toga je za rekonstrukciju i asfaltiranje lokalnih puteva, trgova, parkinga i mostova planiran 1,1 milion konvertibilnih maraka, a za ljetno održavanje cesta, nabavku repromaterijala za sanaciju udarnih rupa na lokalnim cestama, obnovu i izradu saobraćajne signalizacije na lokalnim i nekategorisanim cestama, kao i održavanje potapajućih stubića za zaštitu pješačkih zona na trgovima izdvojeno pola miliona konvertibilnih maraka.

Sanacija i asfaltiranje 36 ulica

Programom investicionog održavanja i rekonstrukcije cesta, planirano je asfaltiranje i sanacija 36 ulica, koje će se raditi na širem prostoru Novog Grada.

Kao i prošle godine i ovogodišnjim Programom osim sanacije oštećenih cesta, asfaltirat će se i veliki broj ulica koje do sada nisu imale asfalt, a bit će nastavljeni i projekti sanacije i proširivanja naseljskih saobraćajnica kojima se odvija javni gradski prevoz.

Radit će se sanacija dijelova ulice Avde Palića od broja 267 A do broja 267 B i od broja 37 do broja 39, sanacija dijela ulice Jusufa Juke Gojaka od broja 65 do broja 25 I i do broja 25. Bit će asfaltiran i dio ulice Ferida Srnje od broja 65 do broja 47 A, kao i dio ulice Zaima Imamovića od broja 86 G do broja 90, te dijela ulice Mustafe Muje Pašića.

Planirano je asfaltiranje dijela ulice Adema Buće od broja 401 do broja 407, kao i dijela ulice Kodžina od broja 123 do broja 133 i dijela od broja 181 do broja 183.

Asfalt će dobiti i stanovnici ulice Ferida Srnje od broja 9 do broja 29, a uradit će se i sanacija dijela ulice Avde Hodžića od broja 30 do broja 261 i od broja 23 do broja 19. Izvršit će se sanacija dijela ulice



Vrbovska čikma od broja 70 do broja 62, te od broja 30 do broja 40.

Prvi put će biti asfaltiran dio ulice Harisa Kurtovića do broja 70 izlaz na Novopazarsku ulicu, Doljanska ulica od broja 3 do broja 15, te dio ulice Branislava Nušića od broja 121 A do broja 121 E, dio ulice Andreja Andrejevića od broja 142 do broja 148, ulice Vladimira Preloga od broja 11 do broja 16, gdje je kod broja 91 planirana izgradnja potpornog zida.

Asfaltirat će se i dio ulice Vladimira Preloga od broja 91 do spoja sa ulicom Derviša Sude Vražalice, ulice Hameda Hodovića od broja 39 A do broja 35, dijela ulice Grada Bobovca od broja 92 do broja 92 C i kod broja 68, dio ulice Bana Borića kod broja 25, ulice Ragiba Džinde od broja 85 do broja 89, kao i ulice Brezanska čikma od broja 23 do broja 35. Sanirat će se i ulaz u ulicu hadži Ahmeda Kandelije.

Planirana je izgradnja pješačke staze u ulici Prnjavorska od broja 2 do broja 16, a u Novopazarskoj ulici broj 452 A bit će izgrađen potporni zid.

Također programom je planirana sanacija ulice Porodice Korkut od broja 19 do broja 25, ulice Mihaljevska od broja 22 do broja 40,



dijela ulice Šehidska od broja 41 do broja 38, ulice Ramiza Hrvačića od broja 2 do broja 6, zatim sanacija ulice Porodice Dizdarević od broja 19 do broja 13, te od broja 27 do broja 23, ulice Braće Bešo od broja 13 do broja 60, Ramiza Hrvačića od broja 54 do broja 35, dio ulice Mihaljevska od broja 225 do broja 186, Paljevska od broja 290 do broja 268 i od broja 360 do broja 378, te sanacija dijela ulice Mustafe Bajića.

Rezervna lista za sanaciju još osam ulica

Vijeće je usvojilo i rezervnu listu ulica koje će se sanirati u slučaju uštede ili obezbjeđenja dodatnih finansijskih sredstava. Listu čini osam ulica koje su po ustaljenoj proceduri kandidovane od strane mjesnih zajednica, kao i cesta koje se shodno uslovima i stanju na terenu mogu asfaltirati u skladu sa tehničkim standardima za tu vrstu poslova, te drugih faktora (imovinski-pravni odnosi, provedbeno-planska dokumentacija, bezbjednosti sl.).

Rezervnom listom planirana je sanacija ulice Ahatovička od broja 2 do broja 102, izgradnja potpornog zida i sanacija djela ulice Abdurahmana Sirije od broja 37 do broja 39, sanacija i proširenje ulice Amira Muharemovića, sanacija dijela ulice Ive Andrića od broja 1 (požarni put), sanacija dijela ulice Braće Čamdžić od broja 4 do broja 17, izgradnja nove saobraćajnice pristupa MZ "Alipašin Most II" i ambulanti, te sanacija ulice Osmana Đikića od spoja sa ulicom Adema Buće i izgradnja potpornog zida u ulici Bužimska broja 15.

Sanaciju oštećenja na lokalnim cestama vršit će JP "Lokom"

Kako je u ranijim godinama bilo problema sa izvođačima radova kod sanacije udarnih rupa koji nisu adekvatno odgovorili zahtjevima Općine, od 2019. godine JP "Lokom" d.o.o. preuzelo je dio ljetnog održavanja cesta koje se odnosi na sanaciju oštećenja na lokalnim cestama s ciljem bržeg djelovanja na sanaciji oštećenih kolovoznih površina.

Obzirom na to da se ovaj način sanacije pokazao kao uspješna praksa, u ovoj godini su izdvojena nešto veća finansijska sredstva, obzirom da je JP „Lokom“ dodatno opremljen novom mehanizacijom sa kojom će biti u mogućnosti sanirati oštećenja na kraćim dionicama lokalnih i nekategorisanih cesta, a koje imaju veći obim oštećenja. Ovim modelom i dinamikom izvođenja radova, ceste u nadležnosti Općine Novi Grad Sarajevo će se u narednom periodu dovesti na veći nivo saobraćajne usluge i sigurnosti.

Redovno održavanje cesta će se vršiti prema stanju saobraćajnica i saobraćajne signalizacije, zahtjevima mjesnih zajednica, građana i policijske uprave, na osnovu kojih će resorna Služba definisati prioritete izvođenja radova čime će se osigurati uslovi za bezbjednije odvijanje saobraćaja. Sredstva u iznosu od 1,7 miliona KM naznačena su u Općinskom budžetu za izgradnju i rekonstrukciju primarnih saobraćajnica (IX transferzala, ulica Džemala Bijedića i Dobroševića), a projekti se realiziraju u saradnji sa Direkcijom za puteve Kantona Sarajevo.

Usvojen Izvještaj Komisije za izbor organa mjesnih zajednica

Vijeće je usvojilo i Izvještaj Komisije za izbor organa mjesnih zajednica o provedenim izborima za savjete mjesnih zajednica na području općine Novi Grad Sarajevo, koji su održani 20.03.2022. godine. Od



Hikmet Kazić



Alen Zorlak

ukupno prijavljenih 566 kandidata, izabrano je 188 novih članova savjeta 28 mjesnih zajednica novogradske Općine.

Pravo glasa na ovim izborima imalo je 115.257 birača, a nove članove savjeta mjesnih zajednica izabralo je 16.682 građana koji su izašli na izbore, odnosno 14,47% građana. Odluka o raspisivanju izbora za članove savjeta mjesnih zajednica donesena je 27. januara ove godine, na 11. sjednici Općinskog vijeća Novi Grad Sarajevo.

Alen Zorlak, predsjednik Komisije za izbor organa mjesnih zajednica kazao je da su izbori za članove savjeta mjesnih zajednica protekli u demokratskom duhu. „Odlukom o raspisivanju izbora imenovana je Komisija u sastavu od četrnaest članova. Cijeli izborni procesi su se vodili zakonskim propisima, Odlukom Općinskog vijeća, Pravilnikom o provođenju izbora, rokovniku aktivnosti kojeg je donijela Komisija i osnovnim principima Izbornog zakona, kojeg smo primjenjivali u toku metodologije rada izbornog procesa. Sve odluke koje je Komisija donijela, donijete su jednoglasno bez ikakvih dilema“, kazao je Zorlak.

Donesena Odluka o dodjeli jednokratne novčane pomoći porodicama sa četvero i više djece

Općinsko vijeće Novi Grad Sarajevo usvojilo je Odluku o jednokratnoj novčanoj pomoći porodicama sa četvero i više djece na području općine Novi Grad Sarajevo, čija će naknada na godišnjem nivou iznositi od 1.200 do 2.400 KM, u zavisnosti od broje djece.

Za porodice sa četvero djece visina novčane pomoći iznositi će 1.200 KM godišnje, za porodice sa petero djece 1.500 KM godišnje, za porodice sa šestoro djece 1.800 KM godišnje, dok će porodice sa sedmero djece primiti naknadu od 2.100KM godišnje. Za porodice sa osmero i više djece, visina novčane pomoći iznositi će 2.400 KM godišnje.

Predsjedavajući Općinskog vijeća Mirza Selimbegović izrazio je zadovoljstvo da je Općina Novi Grad prva Općina sa ovakvim mjerama koje se odnose na višečlane porodice. "Općina Novi Grad malo više obraća pažnju na porodice sa više djece. O natalitetnim mjerama trebamo govoriti i u budućnosti. Nadamo se da će to doprinijeti da imamo veći broj stanovnika, da nam ljudi ne odlaze, da ove ulice koje asfaltiramo, radimo i uređujemo da ne budu prazne, nego da njima šetaju naša djeca," kazao je predsjedavajući Selimbegović, zahvalivši se Službi kabineta općinskog načelnika na pomoći u pripremi same Odluke.

Usvojena Odluka o izmjenama i dopunama Odluke o javnim priznanjima Općine Novi Grad Sarajevo

Općinsko vijeće je usvojilo Odluku o izmjenama i dopunama odluke o javnim priznanjima Općine Novi Grad Sarajevo. Odluka se odnosi na to da se u jubilarnim godinama obilježavanja "Dana odbrane Općine Novi Grad Sarajevo može dodijeliti javno priznanje Zlatna plaketa odbrane Općine Novi Grad Sarajevo i Zahvalnica. Broj zlatnih plaketa i zahvalnica utvrdit će Komsija za odlikovanje, nagrade i druga priznanja, na osnovu dostavljenih prijedloga i predložit će ih Općinskom vijeću na usvajanje.





Stanje komunalne higijene nije na zadovoljavajućem nivou

Vijećnicima je prezentirana informacija o stanju komunalne higijene na području općine Novi Grad Sarajevo, sa posebnim osvrtom na stanje u mjesnim zajednicama uz mjere za poboljšanje. Ekrem Čaušević, rukovodilac radne jedinice Novi Grad KJKP "RAD" d.o.o. Sarajevo informisao je o redovnom i vanrednom odvozu komunalnog otpada, problemima koji se javljaju prilikom odlaganja, prikupljanja i odvoza otpada, održavanju komunalne higijene, koja se odnosi na čišćenje prometnih saobraćajnica, te o prijedlozima za poboljšanje komunalne higijene na području općine Novi Grad Sarajevo. Vijećnici su iznijeli primjedbe na neredovan odvoz smeća i drugog otpadnog materijala, kao i nedostatak posuda za odlaganje kućnog otpada u pojedinim dijelovima novogradske općine.

Vijeće je usvojilo i Lokalni akcioni plan za unapređenje prava i položaja osoba sa invaliditetom. Zadatak radne grupe je da se pri izradi lokalnog akcionog plana kao strateškog dokumenta u oblasti invaliditeta, identifikuje postojeće stanje, evidentiraju postojeći problemi i slabosti, prepoznaju i utvrde potrebe osoba sa invaliditetom s ciljem stvaranja ambijenta prilagođenog njihovim potrebama, a u skladu sa realnim mogućnostima lokalne zajednice.

Na sjednici je također usvojen prijedlog Odluke o stavljanju van snage Odluke o objavljivanju javnog oglasa za imenovanje jednog člana Općinske izborne komisije Novi Grad Sarajevo donesene 06.12.2021. godine, sa prijedlogom Odluke o objavljivanju ponovnog javnog oglasa za imenovanje jednog člana OIK-a.

Na 13. radnoj sjednici Općinskog vijeća usvojeni su i izvještaj o utrošku sredstava boračkih uruženja za odobrene projekte za period januar - decembar 2021. godine sa mišljenjem Službe za boračka pitanja, rad, socijalna pitanja i zdravstvo, Izvještaj o realizaciji Odluke o stipendiranju učenika i studenata za školsku 2021/2022. godinu, te Program obilježavanja značajnih događaja, datuma i ličnosti iz perioda odbrambeno - oslobodilačkog rata 1992-1995. i narodno oslobodilačkog rata 1941-1945. u 2022. godini.



Mehmed Karkelja



Ekrem Čaušević



Adisa Šuman



Usvojen je i Nacrt programa 24. tradicionalne manifestacije "Novogradski dani 2022". Nacrt se stavlja u javnu raspravu u trajanju od 15 dana.

Općina Novi Grad Sarajevo sa 50.000 KM podržala izgradnju Muzeja 505. Viteške brigade u Bužimu



Općina Novi Grad Sarajevo podržala je projekat izgradnje Muzeja 505. Viteške brigade Petog korpusa Armije RBiH, koji će se graditi u gradu Bužimu, u čast očuvanja sjećanja na najhrabrije sinove 505. Bužimske herojske brigade, koja je odbranila od agresora zapadne kapije Bosne i Hercegovine.

Načelnik Općine Novi Grad Sarajevo Semir Efendić i načelnik Općine Bužim Mersudin Nanić potpisali su danas sporazum o finansijskoj podršci Općine Novi Grad Sarajevo u realizaciji ovog projekta u iznosu od 50.000 KM.

Muzej 505. Viteške brigade čuvat će uspomenu na slavnu bužimsku brigade, na ratne zasluge ove brigade, njenog čuvenog komandanta, generala Izeta Nanića, kao i sve poginule borce i pripadnike Petog korpusa Armije Bosne i Hercegovine, koji su položili svoje živote braneći našu domovinu, kako bi buduće generacije znale za naše najbolje sinove i njihovu herojsku borbu u odbrani domovine od agresora.

Načelnik Efendić podsjetio je ovom prilikom da je Bužim jedan od zapadnih kapija Bosne i Hercegovine, herojski grad i herojsko mjesto. „Mi svi znamo u Bosni i Hercegovini za herojstvo grada Bužima, generala Izeta Nanića, jednog od devet heroja, od kojih su dvojica iz Općine Novi Grad, rahmetli Safet Hadžić i Safet Zajko, to su neke poveznice između naših općina. Najmanje što možemo uraditi jeste da podržimo jedan ovakav projekat, to je sigurno nešto što je simbol grada Bužima, odbrana i herojstvo u odbrani BiH, koji se pokazao u

tom mjestu. Mogu reći da su stanovnici Bužima ponosni na to, da malo ko u Bosni i Hercegovini na taj način baštini tradiciju odbrane, nećete naći više nigdje da se 20.000 ljudi okupi u povodu herojskih dana kada se obilježavaju ti važni datumi bitaka kao što je to u Bužimu”, istakao je načelnik Efendić.

Načelnik Općine Bužim rekao je da se Muzej 505. Viteške brigade sada nalazi u prostorijama koje nisu uslovne, a u kojem se čuva vrijedna arhivska građa svega onoga što je bila 505. Viteška brigada i rahmetli general Izet Nanić. Istakao je da je vrijeme da se prave nove prostorije, da se koristi savremena tehnologija kako bi se na mlađe generacije prenijelo i sačuvalo sjećanje na najbolje sinove bužimske brigade i generala Izeta Nanića.

„Naša majka i majka našeg generala Rasima Nanić je pred duše svoga supruga i dva sina poklonila, uvakufila zemljište iznad turbeta generala Nanića, gdje ćemo graditi Muzej 505. Viteške brigade. Trenutno se završava glavni projekat, a nakon toga očekujemo raspisivanje tendera za realizaciju ovog projekta”, rekao je Nanić.





DELEGACIJA OPĆINE NOVI GRAD SARAJEVO U POSJETI GRADU IZMIRU



Potpisan sporazum o bratimljenju sa Općinom Karşıyaka

Delegacija Općine Novi Grad Sarajevo i Općinskog vijeća predvođena načelnikom Semirom Efendićem i predsjedavajućim Općinskog vijeća Mirzom Selimbegovićem, od 13 do 16 marta, boravila je u posjeti Gradu Izmiru.

U delegaciji su bile i Adisa Šuman, pomoćnica općinskog načelnika za obrazovanje, kulturu i sport, Amina Vatreš - Nezirević, stručna savjetnica za informisanje javnosti, predsjednik i članovi Komisije za saradnju sa lokalnim zajednicama u BiH i inostranstvu Alem Logo, Adnan Šabanović i Elvis Hodžić, a domaćini su Mehmet Atilla Baysak, zamjenik predsjednika Općinskog vijeća Karşıyaka i član Gradskog vijeća Grada Izmira i Hasan Šehović, predsjednik Svjetskog saveza dijaspore BiH (SSD).

Delegacija sarajevske Općine Novi Grad posjetila je jednu od najvećih općina u Gradu Izmiru, Općinu Karşıyaka, gdje je nakon prijema u uredu načelnika te općine Cemila Tugaya, upriličeno svečano potpisivanje sporazuma o bratimljenju između općina Novi Grad Sarajevo i Karşıyaka. Svečanost su svojim prisustvom uveličali saradnici načelnika Tugaya, vijećnici Općinskog vijeća Općine Karşıyaka i drugi gosti.

Zbog zdravstvenih problema događaju nije prisustvovao načelnik Cemil Tugay, a dobrodošlicu gostima poželio je Mehmet Atilla Baysak, zamjenik predsjednika Općinskog vijeća Karşıyaka i član Gradskog vijeća Grada Izmira.

“U razgovoru sa načelnikom Općine Novi Grad Semirom Efendićem došli smo do zaključka da imamo dosta zajedničkih tačaka između ove dvije općine, stoga nam je drago što ćemo moći da realizujemo

mnoge projekte u različitim poljima i da razmijenimo svoje znanje i iskustva. Mi smo zajedno sa načelnikom Općine Karşıyaka dr. Cemilom Tugayom u novembru prošle godine posjetili vašu Općinu i ovom prilikom vam se zahvaljujemo na gostoprimstvu”, kazao je gospodin Baysak.

Načelnik Efendić se ovom prilikom zahvalio domaćinima, saradnicima načelnika Cemila Tugaya, vijećnicima Općinskog vijeća Općine Karşıyaka i ostalima koji su prisustvovali svečanosti. Kazao je da je Novi Grad Sarajevo jedna od četiri općine u Sarajevu, glavnom gradu Bosne i Hercegovine, koja ima oko 130.000 stanovnika i mnogo ulaže u razvoj infrastrukture, saobraćaja, obrazovanja, sporta, kulture itd.

Brojne su oblasti u kojima dvije lokalne zajednice mogu saradivati, od obnovljivih izvora energije do izgradnje različitih sadržaja za naše generacije, od najmlađih do najstarijih generacija koje žive u općinama. “Ljudi u BiH i Republici Turskoj su na jedan poseban način povezani. Nevezano za naše protokole, za naše politike, naša dva naroda imaju vezu, koja između srca funkcionise i prepoznaje se, tako da je za nas potpisivanje sporazuma o bratimljenju sasvim prirodno, ali nas u isto vrijeme obavezuje da radimo konkretnije, da budemo u stalnom kontaktu i da krenemo raditi na konkretnim projektima saradnje”, istakao je načelnik Efendić.

Tokom boravka u gradu Izmiru, upriličen je obilazak brojnih kulturno - historijskih znamenitosti grada u kojem živi oko 4,5 miliona stanovnika, mezar našeg Trebinjca, rahmetli Kemele Baysaka, počasnog bh. konzula u Republici Turskoj I bivšeg gradonačelnika Izmira.



Za delegaciju Općine Novi Grad Sarajevo upriličen je prijem u uredu gradonačelnika Izmiri i u Općini Buca, te obilazak spomen - obilježja "Srebrenica", koje se nalazi u toj općini, gdje je odata počast Srebreničanima, ubijenim tokom agresije na Bosnu i Hercegovinu.

Vijećnik u Gradskom vijeću Grada Sarajeva Alem Logo i predsjednik Komisije za saradnju sa lokalnim zajednicama u BiH i inostranstvu posebno se zahvalio ovom prilikom domaćinima gospodinu Hasanu Šehoviću i sinu rahmetli Kemala, gospodinu Atili Baysaku.

"Posebna zahvala ide predsjedavajućem OV Novi Grad Sarajevo gospodinu Mirzi Selimbegoviću, načelniku Semiru Efendiću i kolegicama i kolegama, članovima delegacije na implementaciji zacrtanih planova. Danas nam je saopćeno da je Gradsko Vijeće Grada Izmiri donijelo jednoglasnu odluku da 11, jula 2022. Godine svih 180 vijećnika i rukovodstvo Grada Izmiri posjete Srebrenicu I odaju počast žrtvama genocida", rekao je Logo, dodajući da će u narednom periodu zajedničke radne grupe raditi na implementaciji i osnaživanju dogovorenih procesa.





Delegacija Grada Konya posjetila Općinu Novi Grad Sarajevo



Delegacija turskog Grada Konye posjetila je Općinu Novi Grad Sarajevo, gdje je upriličen prijem i prezentacija projekta upravljanja i recikliranja otpadom „Nulti otpad“, kojeg realizira Gradska uprava Konye.

Delegaciju koju je predvodio Yaşar Kahraman, pomoćnik gradonačelnika Konye za upravljanje otpadom, ugostio je Tajib Delalić, pomoćnik načelnika Općine Novi Grad Sarajevo sa saradnicima, a u turskoj delegaciji su bili i Meryem Ceylan, direktorica Odjela za reciklažu otpada i Mehmet Akif Belen, direktor Odjela za nulti otpad i Ali Güner, zadužen za međunarodnu saradnju.

Tokom susreta razmijenjena su pozitivna iskustva projekata koji se provode u svrhu zaštite životne sredine i iskorištavanja kućnog i drugih vrsta otpada za proizvodnju toplotne energije, te je prezentiran jedan od najznačajnijih ekoloških projekata Gradske uprave Konye.

Iskazana je spremnost za zajedničko djelovanje u realizaciji sličnih projekata i na području sarajevske općine Novi Grad, a prije svega na edukaciji stanovništva o značaju pravilnog odlaganja otpada, počev od domaćinstava, preko obrazovnih ustanova, do institucija i razvijanja svijesti kod građana o važnosti pravilnog odlaganja otpada i očuvanja životne sredine, te iskorištavanja recikliranog otpada u pozitivne svrhe.

Yaşar Kahraman, se ovom prilikom zahvalio na lijepom dočeku i kazao da se u Općini Novi Grad ne osjećaju kao stranci, već kao članovi porodice. „U posljednje vrijeme generalno u svijetu se povećao problem okoliša. Cijeli se svijet podigao na noge po pitanju problema klimatskih promjena. Sasvim je razumljivo da se postavlja pitanje

kako rješavati taj problem, riješiti i upravljanje otpadom. Mi na tome već odavno radimo. Nastojimo da i vama pomognemo i da nađemo neko zajedničko rješenje na tom putu“, rekao je Kahraman.

Tajib Delalić je gostima poželio dobrodošlicu i iskazao zadovoljstvo što se ukazala prilika za razmjenu obostranih iskustva u vezi rješavanja gorućeg problema. „Mislim da na čitavoj planeti postoji problem upravljanja otpadom. Mi kao lokalna zajednica koja ima oko 130.000 stanovnika također imamo problem sa upravljanjem otpadom. Nismo direktno uključeni u odvoz i deponovanje otpada na mjesto odlagališta, ali jesmo zainteresovani za rješavanje tog pitanja u našim mjesnim zajednicama. Komunalno preduzeće KJKP „Rad“ koje upravlja otpadom je u nadležnosti Kantona. Mi smo pogođeni problemom neadekvatnog odlaganja otpadom iz razloga što se gradska deponija nalazi na teritoriji naše općine, a ne funkcioniše na adekvatan način. Često se nama stanovnici, koji žive u naseljima oko deponije, javljaju da imaju zdravstvene probleme i posljedice zbog toga“, rekao je Delalić, iskazavši spremnost Općine Novi Grad da uz podršku Grada Konya radi na rješavanju problema odlaganja otpada u naseljima, edukaciji stanovništva o važnosti sortiranja i pravilnog odlaganja kućnog otpada.



Načelnik Efendić ugostio mališane iz vrtića "Dječiji grad" povodom 1. marta - Dana nezavisnosti BiH

Načelnik Općine Novi Grad Sarajevo Semir Efendić danas je ugostio mališane iz vrtića "Dječiji grad" i njihove odgajateljice Aldijanu Hodžić i Eminu Baždar Imamović. Posjeta je upriličena povodom 1. marta - Dana nezavisnosti Bosne i Hercegovine, a za ovu priliku za mališane je pripremljena posebna torta sa oslikanom zastavom naše domovine Bosne i Hercegovine.

Upriličeno je ugodno druženje uz recitacije, pjesme, plesne koreografije i poklone. Posjeta je bila i prilika da mališani načelniku Efendiću uruče crteže koje su pripremili povodom jednog od najznačajnijih datuma u historiji naše domovine, i u znak zahvalnosti što je Općina Novi Grad Sarajevo u proteklom periodu uložila značajna sredstva u izgradnju i adaptaciju vrtića, izgradnju dječijih parkova i igrališta kako bi im osigurala što ugodnije i ljepše mjesto za boravak, odgoj i obrazovanje.

„Željeli smo da 1. mart - Dan nezavisnosti Bosne i Hercegovine obilježimo na jedan poseban način, to jeste da posjetimo načelnika naše Općine Novi Grad Sarajevo gospodina Semira Efendića. Djeca su se radovala današnjem susretu i druženju. Potrudili su se da obuku odjeću u bojama koje su simbol naše domovine. Imali smo priliku vidjeti i njihovo ushićenje kad su ugledali tortu sa zastavom Bosne i Hercegovine. Pored drugih aktivnosti koje provodimo kroz programe vrtića, posebnu pažnju poklanjamo razvijanju ljubavi prema domovini, osjećaju patriotizma i pripadnosti, kroz pripremanje različitih sadržaja posvećenih domovini kao što su recitali, plesne tačke i sl“, kazala je odgajateljica Aldijana Hodžić.

Dodala je da je predstojeći državni praznik bio prilika da se djeca sretnu sa načelnikom Efendićem, uruče mu njihove likovne radove i iskažu zahvalnost za sve što je učinio da bi oni danas imali ugodno mjesto za boravak, te se zahvalila na srdačnoj dobrodošlici uz nadu

da će se saradnja sa Općinom nastaviti i ubuduće kroz različite aktivnosti, ali i one koje se odnose na obilježavanje važnih datuma za državu Bosnu i Hercegovinu.

U vrtiću "Dječiji grad" na Mojmilu boravi oko 260 mališana, uzrasta od šest mjeseci do polaska u školu, raspoređenih u 11 odgojnih grupa.





Općina dodijelila na besplatno korištenje zemljište u državnoj svojini za poljoprivrednu proizvodnju

Treću godinu zaredom Općina Novi Grad Sarajevo dodjeljuje zemljište u državnom vlasništvu na korištenje u poljoprivredne svrhe. Na javni poziv za dodjelu zemljišta ove godine prijavilo se 530 domaćinstava. Oni će imati priliku da na parcelama od oko 300 metara kvadratnih proizvedu hranu za vlastite potrebe. U vremenu inflacije i svakodnevnog rasta cijena svih prehrambenih proizvoda važno je iskoristiti proljetni period i zasijati što više površina na kojima će se proizvoditi domaća i zdrava hrana.

U prethodne dvije godine više od po 200 građana Općine Novi Grad Sarajevo koristilo je bez nadoknade zemljište i za vlastite potrebe proizvodilo hranu. Većina korisnika iskazala je interes za nastavak korištenja zemljišta u prošloj i ovoj godini, ali su se na javni poziv mogli prijaviti i ostali građani koji ranije nisu koristili zemljište.

Putem Udruženja poljoprivrednika Novi Grad, Općina će i ove godine osigurati sjemenski i sadni materijal osnovnih poljoprivrednih kultura.

Osim toga, u planu je da se stanovnicima koji se bave stočarstvom osigura zemljište, kako bi mogli proizvesti stočnu hranu, dok će Civilna zaštita Općine Novi Grad Sarajevo na 5 hektara posijati krompir, za potrebe stanovnika koji su u potrebi, onih koji zbog starosti i bolesti nisu u mogućnosti sami za sebe proizvesti hranu.

U vrijeme kada je svijet zahvaćen globalnom ekonomskom krizom kao i posljedicama pandemije, jedan od najboljih načina da se iskoristi slobodno vrijeme je formiranje i održavanje vlastitog vrta u blizini mjesta stanovanja. Osim toga, vlastita proizvodnja povrća od neprocjenjive je važnosti po ljudsko zdravlje.





Općina sufinansirala nabavku plastenika

Obzirom da je u posljednje vrijeme iskazan veliki interes naših građana za nabavku plastenika, a uzimajući u obzir i velika poskupljenja osnovnih životnih namirnica Općina Novi Grad Sarajevo 18. marta, raspisala je Javni poziv za sufinansiranje nabavke novih plastenika. Dodjeljena su 73 plastenika svima onima koji su zadovoljili kriterije javnog poziva i ostvarili pravo na sufinansiranje plastenika. Dodjeljene su sve vrste plastenika (metalna i plastična konstrukcija sa pripadajućom folijom), maksimalne površine do 50 metara kvadratnih.

Proizvodnja povrća u plastenicima omogućava intenzivno korištenje zemljišta sa mogućnošću smjene nekoliko povrtlarskih kultura tokom godine. Za kvalitetnu proizvodnju u zatvorenom prostoru neophodno je poznavanje potreba svake kulture koja se uzgaja, kao i klimatskih uslova, stoga će građanima biti na raspolaganju i stručna pomoć nadležne Općinske službe, onima kojima ona bude potrebna za uspješno bavljenje poljoprivrednom proizvodnjom.

Općina je finansirala 85% troškova kupovine novog plastenika, dok preostali dio od 15% snose aplikanti.





Uređenje i revitalizacija Parka šume Mojnilo: Počela izgradnja pješačke staze u podnožju brda Mojnilo



Općina Novi Grad Sarajevo realizira projekat uređenja i revitalizacije Parka šume Mojnilo, izletišta na brdu Mojnilo, sa kojeg se pruža jedinstven pogled na grad. Ovaj prirodni pojas, koji se prostire na površini od oko 11 hektara na uzvisini između gradskih naselja Dobrinja, Mojnilo, Švrakino Selo i Alipašino Polje, idealno je odredište za predah i odmor za sve one koji žele uživati u prirodi, a da pri tome ne moraju otići daleko izvan grada.

Prije nekoliko dana započeli su radovi na rekonstrukciji i proširivanju postojeće i izgradnji nove pješačke staze od podnožja brda Mojnilo do Eko-kuće na Mojnilu, dužine oko pola kilometra.

Građanima koji žele slobodno vrijeme provoditi na ovom izletištu bit će na raspolaganju lijepo uređena staza za šetnju, kao i odmorišta sa klupama za sjedenje koja će se raditi u narednom periodu. Trenutno se izvode radovi na trasiranju staze, koja će biti popločana, a vrijednost tih radova je 98.531 KM.

Nakon ovih radova, pristupit će se izgradnji još 350 metara pješačke staze u gornjem dijelu parka i rekonstrukciji postojećih i izgradnji novih odmorišta uz pješačku stazu, izgradnji nadstrešnica sa klupama za odmor i rasvjetom, kao i obilježavanju biljnih vrsta u dijelu arboretuma uz pješačku stazu. U sklopu Parka šume Mojnilo nalazi se arboretum sa oko 1.000 sadnica više od stotinu vrsta brižljivo odabranih, autohtonih i specifičnih biljaka.

Također, je planirano i proširenje Eko-kuće, sa pratećim sadržajima. Općina Novi Grad je obezbijedila projektnu dokumentaciju, te je u fazi pribavljanja neophodnih saglasnosti za ishodovanje odobrenja za građenje. Shodno projektu, predviđeno je da se nadstrešnica postojećeg objekta ustakli, kako bi se dobio prostor za korištenje tokom cijele godine i povećao kapacitet Eko-kuće, gdje će posjetioci parka imati mogućnost da se osvježe i popiju kafu.







Zasađeno 1.100 novih stabala



Općina Novi Grad Sarajevo kontinuirano radi na hortikulturnom uređenju dječijih i sportskih igrališta, prostora uz glavne i naseljske saobraćajnice, šetališta itd. Na prostoru novogradske općine proteklih mjeseci, zasađeno je 1.100 stabala, desetogodišnjih sadnica Graba, Bagrema, Jasena, Tuja, te ukrasnog Bora i Javora i sl., a pored toga izvršena je sadnja oko 20.000 sadnica žive ograde i oko 500 sadnica grmastog ukrasnog rastinja.

Kako bi novogradska naselja bila ljepša i ugodnija za življenje i sa što više zelenila i ukrasnog bilja, u narednom periodu raznolikim sezonskim cvijećem bit će zasađeno oko 3.000 kvadrata prostora naše općine.





Uređene travnate površine

Nakon sadnje drvoreda s obje strane nove saobraćajnice, uskoro će ulicu Džemala Bijedića krasiti i travnate površine.

Uređenje novoizgrađenih zelenih ploha u ulici Džemala Bijedića i sjetvu trave između kolovoznih traka i pješačkih zona vrše ekipe preduzeća Park u okviru sporazuma o saradnji sa Općinom Novi Grad Sarajevo, kojim Općina finansira te radove.

Već od početka maja na ovom lokalitetu trebao bi ozeleniti novi travnjak i početi njegova košnja i održavanje. Ova zona prošle jeseni dobila je više od 250 novih mladih stabala, koja će u narednom periodu krasiti ovaj dio novogradske općine. Nakon ovih radova slijedi hortikulturno uređenje unutrašnjosti novoizgrađenog kružnog toka u toj ulici.



Uređenje parkova i klupa za odmor šetača




Na području općine Novi Grad Sarajevo u toku je uređenje parkova i postavljenje novih klupa i korpi za otpatke, kako bi se građanima osiguralo više mjesta za odmor.

Na zahtjev MZ "Otoka" i najstarije populacije u ulici Brčanska izgrađena je pješačka staza, koja je upotpunjena novim klupama za odmor i korpama za otpatke. Radove finansira Općina Novi Grad, a izvodi ih KJKP "Park". U toku su radovi i u parku u ulici Antuna Branka Šimića, gdje se vrši uklanjanje starih i ugradnja novih klupa i korpi za otpatke zbog devastacije i dotrajalosti, te će se u narednom periodu raditi na hortikulturnom uređenju ovog parka.

Također, zbog velikih oštećenja na klupama, Općina Novi Grad Sarajevo putem JP "Lokom" provodi aktivnosti na uklanjanju i reparaciji oštećenih klupa. Uposlenici JP "Lokom" vrše reparaciju i "osvježavanje" klupa duž šetališta uz Bulevar Meše Selimovića. Klupe se demontiraju i odvoze u radionicu JP "Lokom", te se bruse radi uklanjanja korozije, boje i postavljaju na postojeća mjesta.

Uporedo sa tim radovima JP "Lokom" vrši i uklanjanje svih oštećenih klupa na porostoru novogradske općine, koje predstavljaju opasnost za stanovnike, a koje do sada nadležni nisu tretirali. Te aktivnosti se provode kontinuirano i trajat će mjesec dana.



Izgrađene pješačke staze, trotoari, stepeništa i rukohvati

Za izgradnju i sanaciju pješačkih staza, trotoara, stepeništa i rukohvata na području novogradske općine, iz budžeta Općine Novi Grad Sarajevo izdvojeno je oko 100.000 KM. Programom je obuhvaćeno devet lokacija, a radove izvodi građevinska firma „Ame“ d.o.o. Breza.

Realizacijom ovog projekta građanima će biti omogućena lakša i brža pješačka komunikacija, a posebno djeci, jer je izgradnjom staza i stepeništa u velikoj mjeri skraćen put do škole, vrtića, trolejbuskih stajališta i sl, a ambijent je upotpunjen novim sadnicama stabala i klupama za odmor.

Sanirano je staro oronulo stepenište i rukohvati prema ulazu u stambenu zgradu u ulici Ilije Engela broj 16, u MZ „Čengić Vila“.

Završena je izgradnja pješačke staze u ulici Gradačaka na Čengić Vili, kojom se povezuju postojeće staze i stanovnicima stambenih zgrada broj 4. i 8. omogućava komunikacija sa pijacom Merkur. Duž staza zasađene su sadnice četinara.

Nova pješačka staza izgrađena je od parkinga u Olimpijskoj ulici, prema vrtiću „Dječiji grad“, u MZ „Olimpijsko Selo“. Njenom

izgradnjom stanovnici B faze Alipašinog Polja, više neće pješačiti zelenom površinom kako bi stigli do vrtića „Dječiji grad“ i OŠ „Aleksa Šantić“. Uz staze je zasađen drvodred i izgrađena su odmorišta sa klupama.

Staza za pješake izgrađena je i na dionici od ulice Nadežde Petrović prema ulici Oslobođenilaca Sarajeva, u MZ „Dobrinja B“, a uz staze je zasađen drvodred i izgrađena su odmorišta sa klupama.

Završena je izgradnja pješačke staze koja povezuje novoizgrađeno dječije igralište u ulici Adema Buće od broja 45 do broja 51, u MZ „Buča Potok“, kao i rukohvata na stepeništu prema trolejbuskom stajalištu u MZ „Saraj Polje“.

Narednih dana slijede radovi na saniranju dotrajalih stepeništa i rukohvata u ulici Fočanska – Velikokladuška, u MZ „Aneks“, te izgradnja rukohvata uz stazu pored OŠ „Mehmedalija Mak Dizdar“ u MZ „Otoka“.





IZGRADNJA PRISTUPNIH RAMPI I STAZA



Damir više neće nositi majku u invalidskim kolicima

U stambenoj zgradi, u ulici Hasana Sućeske broj 10, u naselju Saraj Polje, izgrađene su podizna platforma i pristupna staza za osobe sa invaliditetom koje se kreću uz pomoć kolica. Izgradnja pristupnih staza značajno će olakšati svakodnevni život Mevzeti Hadžalić i njenom sinu Damiru, koji je godinama svoju majku u invalidskim kolicima nosio niz stepenice kako bi izašla iz zgrade.

Ovu hrabru ženu, suprugu poginulog šehida, „Zlatnog ljiljana“, rahmetli Senada Hadžalića, ratnog komandanta inženjerijskog bataljona 102. Motorizovane brigade, koji je poginuo na liniji odbrane u naselju Stup, posjetili smo u njenom domu, gdje nas je sa svojim sinom srdačno primila i sa nama podijelila svoju životnu priču. Mevzeti je 2005. godine dijagnosticirana multipla skleroza. Iz godine u godinu stanje se pogoršavalo, a od 2012. godine Mevzeta ne može na svoje noge stati i kreće se uz pomoć kolica. I pored kolica Mevzeta bez pomoći sina sa kojim živi ne može izaći iz stana, a do prije nekoliko dana on ju je morao nositi niz stepenice da bi izašla napolje.

Mevzetin suprug Senad, poginuo je 1993. godine, u 33 godini života, potshumno je odlikovan vojnim priznanjem „Zlatni ljiljan“ i činom majora. U braku su bili svega 10 godina, Mevzeta je ostala sa dvoje male djece, stariji sin ima osam, a mlađi tri godine.

„Radila sam u „Unioninvestu“ 27 godina, penzionisala sam se 2006. godine. Tegobe sam počela osjećati u desnoj nozi, a 2005. godine sugerirano mi je da se radi o multipla sklerozi. Pretrage su trajale dugo, a moje stanje se pogoršavalo. U početku sam mogla da hodam sa hodalicom, međutim 2012. godine pala sam i od tad ne mogu hodati. Sama sam sebi kolica kupila, jer su mi bila potrebna. Nisam mogla otići ni do toaleta, nisam ništa mogla. Dvije godine sam u kući sjedila, psihički sam se trebala dobro srediti, pa tek onda početi novi način života. Podršku mi daju moja djeca“, priča nam Mevzeta i dodaje:

„Kad treba da izađem iz zgrade mogu sa liftom, ali kad izađem iz lifta zbog osam stepenica koje se tu nalaze, ne mogu sići bez pomoći sina ili nekog drugog. Od 2012 godine ne mogu sama izlaziti, tek sam 2019. godine predala zahtjev za postavljanje platforme za izlazak i ulazak u zgradu. To mi se ostvarilo, Općina Novi Grad i općinski načelnik su mi izašli u susret i hvala im puno na tome, jer će meni dosta pomoći u mom životu, kao i mom sinu da mogu izići vani, da odem na kafu.“

Podizna platforma u ulici Žrtava Fašizma br. 6

Vertikalna podizna platforma - lift za pristup osobama sa invaliditetom izgrađena je u stambenoj zgradi u ulici Žrtava Fašizma broj 6, u MZ „Otoka“, čime će svakodnevni život biti olakšan stopostotnim invalidima Miomiru Ninkoviću i Hikmeti Zuko, koji stanuju u toj stambenoj zgradi.

Stanari zgrade u ulici Bajrama Zenunija broj 5 obustavili izgradnju prilazne rampe za invalide

Programom je planirana i izgradnja rampe za invalide u ulici Bajrama Zenunija broj 5, u naselju Alipašino Polje, međutim, radovi su obustavljeni jer su stanari navedenog ulaza insistirali na tome, izražavajući nezadovoljstvo zbog estetskog izgleda projektovanog rješenja pristupne staze za invalide.

Općina Novi Grad Sarajevo iz budžeta je izdvojila oko 240.000 KM kako bi stanovnicima koji imaju poteškoće u kretanju barem malo olakšala svakodnevni život. U narednom periodu, shodno raspoloživim finansijskim sredstvima podizne platforme radit će se u sljedećim stambenim zgradama: u ulici Trg Sarajevske olimpijade broj 12, Sakle Nezečića broj 2, Nerkeza Smailagića broj 10 i Dobrinjske bolnice broj 2, dok će se prilazne rampe za invalide graditi u ulicama Nerkeza Smailagića broj 7, Trg ZAVNOBiH-a broj 29 i Trg ZAVNOBiH-a broj 1.



Nove ploče na Bulevaru branilaca Dobrinje

U toku su finalni, završni radovi na popločanju drugog dijela Bulevara branilaca Dobrinje - dionica od spoja sa ulicom Nurije Pozderca do spoja sa ulicom Esada Pašalića, dužine oko 400 metara.

Općina Novi Grad je u ranijem periodu završila popločanje jedne strane bulevara i uređenje zelenog pojasa, nakon čega su započeli radovi na zamjeni starog dotrajalog popločanja s druge strane bulevara.

U dijelu šetnice na kojem su ploče zamijenjene, ranije je zbog kretanja automobila dolazilo do oštećenja i bilo je skoro nemoguće sanirati pločnike, međutim, nakon što je ugradnjom potapajućih stubića fizički onemogućen saobraćaj na ovom prostoru, stvoreni su uslovi za ugradnju novih ploča i uređenje i ovog dijela bulevara.

Ugrađene su betonske ploče debljine 8 cm u boji granitno siva, svijetlo siva i antracit siva. Ploče su visokog kvaliteta, pojačane izdržljivosti i otpornosti na habanje, smrzavanje i sol za sprečavanje poledice. Vrijednost radova iznosi 165.906 KM.

Uređenje i druge strane pješačke zone, koja će po svojoj dužini, širini i sadržajima, postati prepoznatljivo i omiljeno mjesto za šetnju i druženje stanovnika novogradske općine i grada Sarajeva izvedeni su nakon što je Bulevar branilaca Dobrinje zatvoren za motorni saobraćaj. Izgradnjom novih parkinga, Općina je osigurala prostor za parkiranje vozila, a kretanje motornih vozila Bulevarom potpuno je zabranjeno svakim danom od 17:00 do 06:00 sati, kao i parkiranje automobila.



Sanacija i iluminacija mosta (pasarele) Alipašić Most II

Općina Novi Grad Sarajevo započela je realizaciju sanacije i iluminacije pješačkog mosta (pasarele), takozvanog "zelenog mosta" koji povezuje desni i lijevi dio ove lokalne zajednice.

Most povezuje ulice Srđana Aleksića i Džemala Bijedića sa ulicom Safeta Zajke, vrlo je frekventan, i svakodnevno ga koristi veliki broj građana, jer se u njegovoj blizini nalaze dvije srednje škole, vrtić i MZ "Alipašić Most II".

Također, ovaj pješački most stanovnicima MZ "Alipašić Most" predstavlja kraći put do Alipašićnog Polja, Otoke i drugih naselja s lijeve strane novogradske općine.

Trenutno rasvjeta na mostu ne postoji, a pristupna rasvjeta je veoma loša, što kod građana izaziva nesigurnost u večernjim satima.

U okviru prve faze izvršit će se sanacija ograde, te osvjetljenje mosta LED rasvjetnim tijelima, u okviru kojeg će biti obuhvaćena i iluminacija rukohvata mosta, čime će se omogućiti ugodniji ambijent za građane koji pasarelom prolaze u toku večernjih sati.

Također će se izvršiti popločanje i hortikulturno uređenje pristupnog dijela mosta iz ulice Srđana Aleksića i Džemala Bijedića, te će se na taj način zatvoriti jedna hortikulturna cjelina, sa ulicom Džemala Bijedića, gdje je u proteklom periodu zasađeno oko 250 stabala i drugog ukrasnog bilja.

Tokom izvođenja radova, građanima će biti omogućeno kretanje jednom stranom mosta.

Stručno tehnički nadzor nad navedenim radovima sprovodi firma "Entazis Konsalting" d.o.o. Sarajevo. Rok za izvođenje radova je 45 dana od dana uvođenja izvođača u posao.



Više od 80 novih parking mjesta u B fazi naselja Alipašino Polje

Općina Novi Grad Sarajevo kontinuirano radi na rješavanju saobraćaja u mirovanju, kako bi se obezbijedilo što više prostora za parkiranje motornih vozila, te onemogućilo parkiranje na pješačkim zonama, trotoarima i zelenim površinama.

U B fazi naselja Alipašino Polje izgrađeno je više od 80 novih parking mjesta, nakon što je urađena nova javna rasvjeta duž centralnog trga u ovom naselju.

Potpuno novi parking sa 62 mjesta za parkiranje, horizontalnom signalizacijom i rasvjetom izgrađen je u ulici Nerkeza Smailagića, a u toku je i hortikulturno uređenje prostora oko parkinga.

Urađeno je i proširivanje parkinga u neposrednoj blizini sportske dvorane "Ramiz Salčin", gdje je izgrađeno i iscrtano 20 novih parking mjesta.

Općina Novi Grad Sarajevo započela je tokom 2020. godine projekat izgradnje novih i proširivanje postojećih parking mjesta na svom području u nastojanju rješavanja problema saobraćaja u mirovanju i odvajanja pješačkih zona od zona za motorni saobraćaj.

Planirano je da se unutrašnjost B faze tj. trgovci zatvore za kretanje motornih vozila, i da se pješacima obezbijedi prostor za kretanje, a da se saobraćaj u mirovanju skoncentriše na parkinge.





Sanacija oštećenih krovova 11 stambenih zgrada na području općine Novi Grad Sarajevo



Na području općine Novi Grad Sarajevo u toku je implementacija projekta nužnih popravki na objektima kolektivnog stanovanja, u sklopu kojeg se radi sanacija oštećenih krovova stambenih zgrada koji godinama prokišnjavaju i stvaraju probleme stanarima. Za te radove iz općinskog budžeta izdvojeno je 262.736 KM.

Radit će se sanaciji oštećenja na krovovima zgrada, zbog kojih su ugroženi zdravlje i životi građana. Sanacijom će biti obuhvaćeno 11 zgrada kolektivnog stanovanja na području mjesnih zajednica "Dobrinja B i D", "Briješće", "Švrakino Selo I" i "Čengić Vila.

Završena je sanacija kosog krova na objektu kolektivnog stanovanja u ulici Eniza Cocalića broj 2 (MZ "Dobrinja B"), sanacija ravnog krova na objektu kolektivnog stanovanja u ulici Ali-bega Firdusa čikma broj 2 (MZ "Švrakino Selo I") i Gradačaćka broj 96 (MZ "Čengić Vila"), te sanacija kosog krova zgrade u ulici Trg Sarajevske olimpijade broj 14 (MZ "Dobrinja D"). Također, saniran je krov zgrade u ulici Franje Kluza broj 1 (MZ "Briješće"), kao i kosi krovovi stambenih zgrada u ulicama Hakije Turajlića broj 19 i Marina Držića broj 2 (MZ "Dobrinja B").

U narednom periodu sanirat će se i ravni krovovi na objektima u ulici Emila Zole broj 1 (MZ "Dobrinja C"), u ulici Vahide Maglajlić broj 16, Trg zlatnih ljiljana br. 2 (MZ "Dobrinja B"), te u ulici Ilije Engela broj 8, 9 i 10.

Ugovoreni poslovi obuhvataju zamjenu krovnih pokrivača ili ugradnju novih slojeva hidroizolacije kada su u pitanju ravni krovovi, zamjenu oštećenih limenih opšava, zamjenu dimnjačkih i ventilacionih kapa, malterisanje oštećenih dimnjaka i slično. Radove izvodi firma „SELA“ d.o.o. Sarajevo, a stručni nadzor vrši Institut za građevinarstvo „IG“ d.o.o. Banja Luka. Ugovoreni rok za izvođenje radova je 90 dana od dana uvođenja izvođača u posao.

Iako je održavanje zajedničkih dijelova zgrada kolektivnog stanovanja u nadležnosti etažnih vlasnika, odnosno upravitelja zgrada, Općina u skladu sa finansijskim mogućnostima, svake godine izdvoji određena sredstva za sanaciju najurgentnijih objekata gdje postoji opasnost da budu ugrožene elektro-instalacije, zbog dotrajalih krovova, ili sigurnost građana zbog obrušavanja fasada. Jedan broj krovova koji prema procjeni Službe za inspeksijske poslove predstavljaju najveću opasnost za građane ulazi u program sanacije.

Da bi se popravili svi krovovi u općini Novi Grad, fasade i drugi dijelovi stambenih zgrada kolektivnog stanovanja, potrebna su ogromna sredstva. Stanari i upravitelji stambenih zgrada ova pitanja trebaju rješavati onako kako je to zakonom predviđeno, sredstvima koje uplaćuju za održavanje svojih objekata.



Završena prva faza rekonstrukcije atletske staze u Centru "Safet Zajko"

Završena je prva faza radova na rekonstrukciji tartan staze u Centru "Safet Zajko", prve atletske staze za trčanje u općini Novi Grad Sarajevo, koja je otvorena u septembru 2015. godine, kada i sam Centar.


Obzirom na osjetljivost završnog sloja staze, koji ima svoj vijek trajanja, te da je prema preporukama Međunarodne atletske federacije (IAAF) njeno korištenje predviđeno u trajanju od pet godina, Općina je osigurala sredstva i provela proceduru odabira izvođača radova kako bi se završni sloj staze obnovio.

U sklopu prve faze rekonstrukcije staze, završeni su zanatski građevinski radovi, odnosno proširenje staze prema standardima IAAF-e, što je preduslov za dobivanje certifikata, a u narednom periodu se nastavljaju radovi druge faze, koji obuhvataju rekonstrukciju tartan podloge. Vrijednost navedenih radova je 89.973 KM.

Rekonstrukcija atletske staze radi se na veliku radost svih koji vole trčanje i treniranje, kao i boravak u prelijepom ambijentu Centra "Safet Zajko" u okviru njegovog bogatog zelenila u kojem se atletska staza nalazi. Staza je odlično mjesto za treniranje, prvenstveno zbog lokacije na kojoj se nalazi, ne tako daleko od grada, a opet u zelenilu i prirodi koja daje potpuni ambijent u kojem se može trenirati.

Stazu koristi veliki broj stanovništva, svih generacija, sportista i rekreativaca. Pored atletičara koriste je i sportisti svih drugih sportova, među kojima su košarkaši, fudbaleri, a vrlo često i pripadnici policijskih agencija koji tu obavljaju svoje pripreme i treninge.

Atletski klub Novi Grad svake godine organizira atletske meetinge na toj stazi i ona je vrlo važna za razvoj atletike i zdravijeg načina života građana. Atletski klub Novi Grad osnovan je s ciljem, da prije svega okupi djecu i omladinu koja ima fizičke predispozicije i volju da sistematskim vježbama postižu što bolje sportske rezultate u odgovarajućim atletskim disciplinama.



Izgradnjom vodovodne mreže u Ahatovičkoj i ulici 14. juni, 100 domaćinstava dobija gradsku vodu



Općina Novi Grad Sarajevo realizirat će projekat izgradnje oko dva kilometra vodovodne mreže profila DN100 i 150, u naselju Ahatovići, u dijelovima ulica Ahatovička i 14. juni, u mjesnoj zajednici „Dobroševići“.

Na novoizgrađenu gradsku vodovodnu mrežu bit će priključeno oko 100 domaćinstava koja se trenutno snabdijevaju vodom iz lokalnih vodovoda „Igrište“ i „Djevojačke vode“.

Ovaj projekt je nastavak izgradnje vodovodnog sistema u obuhvatu rezervoara „Donji Mihaljevići“, koji je pušten u rad 2015. godine, a gdje je u proteklom periodu izgrađeno oko 1,5 kilometara vodovodne mreže u ulicama Šehidska i Ranovačka.

Izgradnjom ove distributivne vodovodne mreže stanovništvo će se snabdijevati vodom iz rezervoara „Donji Mihaljevići“ kojim upravlja KJKP „Vodovod i kanalizacija“ d.o.o. Sarajevo, a s obzirom na činjenicu da će sa lokalnih vodovoda biti isključen veliki broj korisnika, stanovnici gornjih dijelova naselja Ahatovići, koji se snabdijevaju vodom iz lokalnih vodovoda, imat će urednije snabdijevanje vodom.

Vrijednost projekta je 462.150 KM, a finansirat će se sredstvima iz budžeta Općine Novi Grad Sarajevo i iz namjenskih sredstava - vodnih naknada Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo.

Općina je pribavila sve potrebne dozvole za izvođenje radova, provela proceduru javne nabavke i izvršila izbor najpovoljnijeg izvođača radova. Izvođenje radova vršit će firma „Harysco“, dok će montažerske radove i radove na priključivanju objekata na novoizgrađeni sistem vršiti KJKP „Vodovod i kanalizacija“, dok će Zavod za izgradnju KS vršiti nadzor nad izvođenjem radova.

U pripremi je i 3. faza nastavka izgradnje vodovodne mreže u dijelovima ulica Ahatovička i 14. juni čime će biti kompletirano sedam kilometara nove vodovodne mreže u MZ „Dobroševići“.

Pored izgradnje vodovodne mreže, u ulici 14. juni uskoro će početi radovi na izgradnji gasne distributivne mreže.





Izgradnja separatne kanalizacione mreže i rekonstrukcija vodovodne mreže u ulici Safeta Ahmetspahića

U ulici Safeta Ahmetspahića nastavljena je realizacija projekta izgradnje separatne kanalizacione mreže i rekonstrukcije vodovodne mreže u naselju Briješće, nakon što je u prošloj godini izgrađeno oko 500 metara duplog separatnog kanalizacionog sistema (oborinskog i fekalnog), u ulici Brezanska i dijelu ulice Safeta Ahmetspahića, čime su se stekli uslovi za nastavak ovog projekta i asfaltiranje ulice.

Općina je potpisala okvirni sporazum o izvođenju radova na izgradnji separatne kanalizacione mreže u ulici Safeta Ahmetspahića sa izabranim izvođačem radova „Harysco“ d.o.o. Sarajevo u iznosu od 533.520 KM koji se finansira iz Budžeta Općine Novi Grad Sarajevo. Potpisan je i Ugovor broj 1 u vrijednosti od 199.999 KM za izgradnju prve dionice u dužini od 190 metara, a radovi su počeli prije nekoliko dana.

Bit će izgrađeno 380 metara kišne kanalizacije FI 500 mm i fekalne kanalizacije FI 300 mm, na koju će biti priključeno oko 20 individualnih stambenih objekata, vršit će se ugradnja šahtova i slivničkih rešetki za odvodnju oborinskih voda sa ulice.

Paralelno sa izgradnjom separatne kanalizacione mreže na ovoj dionici izvode se radovi na rekonstrukciji dotrajale vodovodne mreže. Prema Sporazumu potpisanom između općine i KJKP „Vodovod i kanalizacija, ViK će izvoditi montažne radove na vodovodnoj mreži i priključke na objekte, koji gravitiraju ovoj ulici, a izvođač radova će izvoditi građevinske radove. Vrijednost radova je 71.000 KM, a finansira ih Općina Novi Grad Sarajevo.



Realizacijom ovog projekta, rješava se dugogodišnji problem velikog broja stanovnika jednog od najgušće naseljenih dijelova općine Novi Grad, koji nisu imali adekvatno izgrađenu kanalizacionu mrežu, a zbog čega se nije mogla raditi ni sanacija i asfaltiranje saobraćajnica. Novoizgrađena mreža će biti priključene na gradski vodovodni i kanalizacioni sistem kojim upravlja KJKP „Vodovod i kanalizacija“ čime se postiže veći stepen zaštite okoliša od otpadnih voda i uredno vodsnabdijevanje u ovom dijelu novogradske općine.



Izgrađeno još 600 metara kišne i fekalne kanalizacione mreže u Kodžinoj ulici

Nakon što je u prethodnom periodu izgrađeno oko 800 metara separatne kanalizacione mreže, odnosno duplog cjevovoda za fekalnu i oborinsku kanalizaciju u ulicama Kodžina i Vejsila Čurčića, u naselju Švrakino Selo, Općina Novi Grad Sarajevo nastavila je realizaciju ovog infrastrukturnog projekta značajnog za stanovnike mjesne zajednice „Švrakino Selo II“, koji su imali problem sa improviziranom kanalizacionom mrežom, koja je prouzrokovala puno problema u ljetnom i zimskom periodu.

Izgradnja separatne kanalizacione mreže u ovom dijelu Švrakinog Sela nastavak je realizacije velikog i skupog projekta izgradnje kanalizacione mreže koja će biti priključena na gradski kanalizacioni sistem kojim upravlja KJKP „Vodovod i kanalizacija“ d.o.o. Sarajevo, a koji se radi fazno. Završena je 4. faza realizacije projekta, a radovi su izvedeni na dionici dužine oko 300 metara u ulici Kodžina od broja 101 do broja 151, koja spaja ulice Vejsila Čurčića i Novopazarsku. Izgradnjom oko 600 metara kišne i fekalne kanalizacije, na koju je priključeno oko 20 individualnih stambenih objekata, te ugradnjom šahtova i slivnika, riješit će se dugogodišnji problem plavljenja iz Novopazarske ulice. U narednim danima pristupit će se asfaltiranju kompletne saobraćajnice.

Nakon radova u Kodžinoj ulici, izgradnja separatne kanalizacione mreže bit će nastavljena u dijelu ulice Vejsila Čurčića od broja 22-141 sa izgradnjom 22 priključka na fekalnu i na kišnu kanalizaciju.

Za realizaciju projekta izgradnje separatne kanalizacione mreže u ulicama Kodžina i Vejsila Čurčića potpisan je okvirni sporazum sa izvođačem radova u vrijednosti od 475.605,00 KM. Iz budžeta Općine Novi Grad Sarajevo izdvojeno je 200.000 KM, a projekat sufinansira Ministarstvo komunalne privrede, infrastrukture, prostornog uređenja, građenja i zaštite okoliša KS sredstvima iz vodnih naknada u iznosu od 293.519 KM.

Općina je pribavila sve potrebne dozvole za izvođenje radova, provela proceduru javne nabavke i izvršila izbor najpovoljnijeg izvođača radova. Zavod za izgradnju KS će vršiti nadzor nad izvođenjem radova.

Također, Općina je osigurala i Glavni projekat separatne kanalizacione mreže u ulicama Kodžina i Vejsila Čurčića projektovane dužine 4.518 metara kanala DN 300 mm i 54 metra DN 400 mm. Procijenjena investicijska vrijednost cijelog projekta je oko 2,5 miliona KM.



Izgradnja separatne kanalizacione mreže u ulici Senada Poturka Senčija na Dobrinji

U ulici Senada Poturka Senčija u mjesnoj zajednici "Dobrinja A" završeni su radovi na izgradnji separatne kanalizacione mreže, odnosno fekalne i kišne kanalizacije DN 300 mm dužine 370 metara, nakon čega slijedi rekonstrukcija stare dotrajale vodovodne mreže, dužine oko 500 metara, gdje će biti zamijenjen daktil cjevovod DN 150.

Općina Novi Grad Sarajevo iz ovogodišnjeg je budžeta izdvojila više od pola miliona konvertibilnih maraka za izgradnju vodovodne i separatne kanalizacione mreže u ovoj ulici. Radovima je prethodilo potpisivanje okvirnog sporazuma za izvođenje radova u vrijednosti od 550.224 KM, a radovi su počeli prošle sedmice.

Nakon izgradnje separatne kanalizacione i rekonstrukcije vodovodne mreže radit će se sanacija i asfaltiranje ulice uz izgradnju trotoara za pješake kojeg ulica nije imala.

Na novizgrađenu vodovodnu i kanalizacionu mrežu bit će priključen i Sportsko - rekreacioni centar, sa otvorenim bazenima na Dobrinji, čija izgradnja se privodi kraju i koji bi trebao biti otvoren u ovoj

godini. Također, uradit će se i priključi stambenih objekata na novoizgrađenu kanalizacionu i vodovodnu mrežu.

Svi radovi se izvode uz nadzor predstavnika KJKP „VIK“ d.o.o. Sarajevo, a stručno tehnički nadzor vršit će firma „Arting BH“ d.o.o Sarajevo.





U Mihaljevskoj ulici izgrađena oborinska kanalizaciona odvodnja



Mještanan naselja Dobroševići Asmir Memić, više od 20 godina stanuje u Mihaljevskoj ulici, koja je gusto naseljena, a nije imala riješenu kanalizacionu mrežu. Kaže da su se fekalne i oborinske vode usljed većih kišnih padavina slijevale niz ulicu, što je stanovnicima predstavljalo veliki problem u ljetnim, ali i zimskim mjesecima.

Kako bi se ovaj problem riješio, Općina Novi Grad Sarajevo osigurala je finansijska sredstva i provela proceduru izbora izvođača radova za izgradnju oborinske kanalizacione odvodnje u ovoj ulici. Položeno je oko 950 metara cjevovoda, a u toku je asfaltiranje cesete.

“Živim ovdje već nekih 20 godina. Ova kanalizacija nam puno znači što se tiče djece i odraslih. U ljetnom periodu užasni su neugodni mirisi, a prve kiše kad padnu ovdje je kaos, mora se u čizmama hodati da bi se moglo proći ulicom. Sada je urađeno ucjvljenje otvorenog kanala kojim su tekle fekalije, a osim što je to riješeno, proširen nam je i put što će poboljšati odvijanje motornog saobraćaja”, kazao je Asmir.

Izgradnja oborinskog kolektora urađena je na dionici dužine blizu kilometra. U ovom dijelu naselja oborinska voda bila je pomiješana sa fekalnim odvodima iz velikog broja stambenih objekata. Obzirom da na prostoru Dobroševića, Reljeva i Bojnika nije riješeno pitanje centralnog kolektora za kanalizaciju, Općina je uradila rješenje koje podrazumijeva oborinsku odvodnju, gdje će na neki način to biti mješoviti kanal do nekog vremena kada će u potpunosti biti riješeno pitanje kanalizacije za ova naselja.

Vrijednost radova je oko 300.000 KM. Nakon ovih radova na isti način će se rješavati ulica Ranovačka u dužini oko 650 metara. Vrijednost tih radova je oko 185.000 KM.

Uz kolektor mještani su dobili širu saobraćajnicu do metar i po.





Asfaltirana ulica Atifa Čoke u naselju Zabrđe



U Jajačkoj ulici - MZ "Švrakino Selo III" izgrađen novi potporni zid, nakon čega će uslijediti asfaltiranje ulice.



Počeli su radovi na sanaciji ulice Mehe Žige od broja 2 do broja 28 u naselju Dobroševići



Izgrađena pješačka staza od ulice Vrbovska čikma, od broja 27. Izgradnjom staze poboljšani su uslovi za sigurno kretanje pješaka, posebno djece koja pješačku stazu koriste kao jedan od prilaza školi.



Radovi na sanaciji prokopa i proširenju saobraćajnice u ulici Mihaljevska nakon izgradnje 950 metara oborinske kanalizacije

Na brdu Žuč otvoreno prvo

Povodom Dana Armije RBiH, 15. aprila, na brdu Žuč, mjestu odbrane Sarajeva i BiH od agresora, otvoreno je prvo i jedino sportsko strelište na otvorenom izgrađeno u poslijeratnom periodu u Sarajevu. Strelište se nalazi na lokalitetu između Doma oslobodilaca i Golog brda, gdje je u narednom periodu planirana izgradnja spomenika oslobodiocima Sarajeva "Kрила slobode".

Na svečanom otvaranju prisutnima su se obratili načelnik Općine Novi Grad Sarajevo Semir Efendić i Edin Čano, direktor JP „Lokom“.

Načelnik Efendić čestitao je Dan Armije RBiH koja je neke od svojih najvećih bitaka izvela na brdu Žuč, na Golom brdu, brdu Vis i koti 850. „Nekako simbolički na Dan formiranja Armije RBiH mi upotpunjujemo plato Brda Zuč sa još jednim sadržajem. Ranije je izgrađen Dom oslobodilaca, na ulaznoj kapiji, koji je omiljeno mjesto za brojne Sarajlije. On ima muzej dviju ratnih brigada koje su se borile na brdu Zuč. Drugi sadržaj kojeg otvaramo je strelište koje će u narednim godinama biti dom za brojne zaljubljenike u

ovaj sport. Također, imamo i lokalitet Golog Brda, gdje je u pripremi projekat izgradnje Centralnog spomen - obilježja, koje će zaista biti monumentalno, vjerovatno najljepše u cijeloj Bosni i Hercegovini", kazao je Efendić.

Edin Čano, direktor JP "Lokom" istakao je kako je streljaštvo kao sport jedan od najzastupljenijih u svijetu, te da je ovo prvo civilno strelište u Kantonu Sarajevo. „Preko 160 zemalja praktikuje streljaštvo kao sport. U našoj zemlji u zadnje vrijeme prisutna je ekspanzija sporta. Meni je posebno drago što žene zauzimaju sve veći broj u ovom sportu. Zahvaljejem se načelniku Efendiću, jer da on nije prepoznao značaj ovog projekta ovog objekta još uvijek ne bi bilo," kazao je Čano.

Pored sportista, strelište će moći koristiti pripadnici sigurnosnih agencija, policija, vojne strukture i svi oni koji budu željeli koristiti pogodnosti ove lokacije za treniranje i vježbu.



sportsko strelište u Sarajevu





Mališani iz vrtića u akciji sadnje stabala



Povodom obilježavanja 6. aprila Dana Grada Sarajeva na području općine Novi Grad provedena je akcija pošumljavanja. Akciju je organizirala Općina Novi Grad, a realizirana je u saradnji sa predstavnicima KJKP "Park" i novogradskih vrtića „Vjeverica“, vrtić „Lastavica“, vrtić „Dunja“, vrtić „Labudovi“, vrtić „Srećica“, vrtić „Dječiji grad“, vrtić „Kadifca“, vrtić „Žubor“ i vrtić „Zeko“. Zasađena su stabla Bijelog Jasena, Katalpa, Ginko, Javor kultivar, Tuja, Likvidambar, Crveni Javor, te stabla Čempresa i Katalpa.



Novogradski osnovci posjetili Spomenički kompleks Tunel D-B



Općina Novi Grad Sarajevo organizirala je posjetu učenika VIII razreda novogradskih osnovnih škola Spomeničkom kompleksu Tunel D-B, poznat kao "Tunel spasa". Ovaj kompleks posjetili su učenici osnovnih škola: "Sokolje", "Umihana Čuvidina", "Avdo Smailović", "Aleksa Šantić", "Skender Kulenović", "Mustafa Busuladžić", "Fatima Gunić", "Meša Selimović", Čamil Sijarić, "Behaudin Selmanović", "Osman Nuri Hadžić", "Osman Nakaš", PU "Maarif", "Mehmedalija Mak Dizdar", "Džemaludin Čaušević" i "Aneks".

Tunel spasa jedinstveno je mjesto sjećanja na ratne dane iz odbrambeno oslobodilačkog rata.

Ova aktivnost se provodi sa ciljem podizanja svijesti kod učenika o prošlosti Sarajeva u periodu agresije na BiH od

1992-1995. godine kroz upoznavanje sa stalnom muzejskom postavkom ovog kompleksa i uvid u autentični dio ratnog tunela. Učenici su imali priliku slušati historijski čas, pogledati kratki film o opsadi Sarajeva i značaju Tunela za opstanak Sarajlija tokom opsade grada.

Općina Novi Grad Sarajevo je obezbijedila prijevoz za učenike od škole do Tunela i nazad.

Sarajevski ratni tunel izgrađen je tokom 1993. godine ispod aerodromske piste i povezivao je dvije teritorije koje je držala Armija RBiH (Dobrinju i Butmir), pa je tako i nazvan "Tunel D-B".

Tunel je dug oko 720 metara, a visok oko 1,5 m dok je na nekim dijelovima bio visok i do 1,8 metara.



Pobjedničke ekipe OŠ "Ćamil Sijarić" i "Sokolje"



U dvorani „Ramiz Salčin“ 13. i 14. aprila održano je općinsko takmičenje u odbojci za djevojčice i dječake, učenike novogradskih osnovnih škola. Učešće u ovom takmičenju uzelo je 14 ekipa koju čine djevojčice i osam školskih ekipa dječaka.

Prvo mjesto u kategoriji djevojčica osvojila je ekipa OŠ "Ćamil Sijarić", dok su među muškim ekipama najbolji bili učenici OŠ "Sokolje".



U ulici Sarajevskih ilegalaca gradi se novo sportsko igralište



Načelnik Općine Novi Grad Sarajevo Semir Efendić sa saradnicima i članovima savjeta mjesnih zajednica, obišao je gradilište u ulici Sarajevskih ilegalaca, gdje je počela izgradnja sportskog igrališta za djecu. To će biti igralište sa gumiranom podlogom za mali nogomet i košarku. Teren će biti ograđen, a u sklopu njega bit će postavljene klupe za sjedenje.

Konačno smo dočekali lijepo vrijeme i radovi u svim dijelovima općine Novi Grad započinju. Obišli smo gradilište gdje kreće izgradnja sportskog igrališta za djecu. To će biti igralište sa gumiranom podlogom, malim golovima i košem. To je višegodišnji zahtjev stanovnika ovog dijela općine Novi Grad Sarajevo. Pored toga obišli smo stazu koja povezuje dva dijela naselja Dobrinja koja su ranije bila „odsječena“. Ono što me posebno raduje je to da u skoro svakom našem projektu imamo i hortikulturni dio, tako da je duž staze zasađen drvored sadnica koji već sada krasi ovaj dio naselja. Ukupno je 1.100 novih desetogodišnjih stabala zasađeno na području Novog Grada od jeseni do proljeća. Pored toga, u narednom periodu planirana je sadnja ukrasnog rastinja na brojnim lokacijama, a trebalo bi biti zasađeno oko 3.000 kvadrata cvijeća, na svim trgovima u Novom Gradu, tako da će ove godine Novi Grad biti ljepši nego što je bio“, kazao je načelnik Efendić.

Obilaskom naselja Dobrinja 5C i Aerodromsko Naselje, delegacija je obišla i sportsko igralište u ulici Šafika Dorića, na kojem se planiraju radovi i sportsko igralište u ulici Šefika Dorića i Andreja Andrejevića, gdje se također planiraju radovi na ugradnji gumene sportske podloge i sanacija ograde. U sklopu ovih radova će biti izvedena i pristupna staza i rampa za osobe sa poteškoćama u kretanju.





Ususret Ramazanu Općina Novi Grad Sarajevo organizirala predramazanski koncert



Povodom mjeseca Ramazana, Općina Novi Grad Sarajevo organizirala je predramazanski koncert "Ususret Ramazanu".

Koncert je održan uz prisustvo više stotina građana, 30. marta, u prepunoj multimedijalnoj sali Općine Novi Grad Sarajevo.

Prisutni su imali priliku da uživaju u poznatim interpretacijama najjemenitnijih izvođača islamske duhovne muzike i sevdalinke Armina Muzaferije, Šahe Isaković Jelačić, i Mustafe Isakovića. Obzirom na veliki interes naših građana za prisustvovanje koncertu, te da je multimedijalna sala bila mala da primi sve posjetioce, za sve one koji nisu mogli ući u salu, osiguran je direktan prenos koncerta putem led ekrana u holu ispred sale.

Prisutni su imali priliku slušati dobro poznate interpretacije i razgaliti dušu pred nadolazeći mubarek mjesec uz izvedbe "Kad Ramazan dolazi", "Devet heroja", "Da je Bosna od Dženneta", "Baščo bijela", "Studen vodo", "Džehva" i druge izvedbe, kao i Ašere koje je proučio mladi hafiz Ahmed Hamidović.

Manifestacija je održana u organizaciji Općine Novi Grad Sarajevo, a za vrhunsku scenografiju, besprijekoran zvuk i live prijenos pobrinuo se tim Armina Muzaferije.



Izložba „Gradovi i pejzaži BiH u akvarelu“

U Galeriji Općine Novi Grad Sarajevo 28. januara otvorena je prva izložba u ovoj godini pod nazivom „Gradovi i pejzaži Bosne i Hercegovine u akvarelu“, akademske slikarice profesorice Nerice Osmančević Abdulić.

Izložba je koncipirana kao kultura akvarela, tematskim nazivom „Portreti grada“, kao promocija tehnike akvarela i umjetničkog portreta bosansko - hercegovačkih gradova. Ozbiljna umjetnost je uvijek pratila historijski razvoj i socijalna dešavanja određenog vremena, tako da i slikarica Osmančević Abdulić daje doprinos u tom smislu bilježeći portrete Sarajeva i cijele BiH, te ukazuje na ljepotu BiH.

Profesorica Osmančević Abdulić radi slikarskom tehnikom akvarel koja je dijelom zapostavljena u BiH, a izložba ima za cilj afirmaciju ove najteže slikarske tehnike koja je neopravdano potcijenjena i ne izaziva interes u likovnim krugovima.

„Ovom prilikom se zahvaljujem Općini Novi Grad Sarajevo što je omogućila da danas predstavim ovu izložbu. Akvarel zahtijeva poseban senzibilitet i umijeće da svaku kontroliranu slučajnost pretvori u umjetnički iskaz. Ali ta „slučajnost“ mora biti prepoznata na vrijeme, kako suvišni potezi ne bi umanjili identitet iskaza. Sve to nastaje tek kada se akvarel tehnički dovede do savršenstva,“ kazala je Osmančević Abdulić.



Nerica Osmančević Abdulić



Izložba “Crteži” u galeriji Općine Novi Grad Sarajevo

U Galeriji Općine Novi Grad Sarajevo 30. marta otvorena je izložba “Crteži” učenika Srednje škole primijenjenih umjetnosti Sarajevo. Na izložbi su predstavljene radovi 28 najuspješnijih učenika iz predmeta crtanje. Izložba predstavlja najbolji prikaz onoga što učenici rade na časovima.

Predstavljene radovi prikazuju dvije tehnike, a to su ljudska figura i mrtva priroda koja karakteriše zanimljivo predstavljanje neživih predmeta, kao što su: hrana, cvijeće, biljke itd., u datom prostoru.



“Sjećanje na Brčko” zajednička izložba likovnih umjetnica Mirsade Masal i Ilonke Jasak

“Sjećanje na Brčko” zajednička izložba članica Udruženja likovnih umjetnika Bosne i Hercegovine Mirsade Masal i Ilonke Jasak, otvorena je u Galeriji Općine Novi Grad Sarajevo. Posjetiocima, ljubiteljima likovne umjetnosti izložba je bila na raspolaganju do 24. februara.

Izložba predstavlja dio umjetničkih radova izložbe održane u Umjetničkoj galeriji Brčko 2020. godine. Autorice Mirsada Masal i Ilonka Jasak predstavile su umjetnička djela rađena u tehnikama ulje na platnu i kolaži rađeni od većih i manjih komadića različitih vrsta papira

Prilikom otvaranja izložbe Mirsada Masal zahvalila je Općini Novi Grad Sarajevo na organizaciji i datoj mogućnosti da ovu izložbu i naprave u ovom prostoru. „Tu je izloženo desetak mojih slika, nešto malo minijatura. Rađene su tehnikom ulja na platnu, ideje

za moje slike nastale su iz duše, odnosno unutrašnjeg stanja i emocije. Volim da radim eksploziju boja, linija - boja i oblika. Kroz sam proces rada postoje ta određena razmišljanja, gdje na kraju slika dobiva svoju formu i na taj način volim da me slika na kraju iznenadi“, kazala je Masal.

Ilonka Jasak govorila je dugogodišnjem prijateljstvu sa Mirsadam, njihovoj ljubavi prema fotografiji i umjetnosti, te međusobnoj povezanosti dvije umjetničke duše.

„Ovo je naša četvrta zajednička izložba. Udvoje je uvijek lakše, ljepše se osloniti jedna na drugu. Senzibilitet nam je jako sličan, u dva dana smo rođene. Moje slike su apstraknte, dok Mirsadinu vuku ka stilizaciji, ka apstrakciji i ti motivi su prepoznatljiviji. Radimo sa puno emocije, slojeva i sama postavka je postavljena naizmjenično jedna Mirsadinu, jedna moja fotografija“, kazala je Jasak.



Ilonka Jasak i Mirsada Masal





„Umjetnost iz izloga”, izložba autora Zorana Lešića, Almina Zrne, Tarika Jesenkovića, Agdala Nuhanovića, Ismara Žalice



U galeriji Općine Novi Grad Sarajevo 25. februara upriličena je izložba „Umjetnost iz izloga”, Udruženja likovnih umjetnika primijenjenih umjetnosti i dizajnera u Bosni i Hercegovini. Na izložbi su se predstavili istaknuti bh. umjetnik Zoran Lešić, Almin Zrno, Tarik Jesenković, Agdal Nuhanović i Ismar Žalica.

Ove godine za projekat “Umjetnost iz izloga”, predstavljena je sekcija umjetničke fotografije. Pojedini članovi/ice Udruženja su nosioci najvećih svjetskih priznanja. Fotografija je najrasprostranjeniji umjetnički medij koji obuhvata različite teme i sadržaje.




U 2021. godini Udruženje likovnih umjetnika primijenjenih umjetnosti i dizajnera u Bosni i Hercegovini, (ULUPUBIH) započelo je saradnju sa Općinom Novi Grad Sarajevo izložbom “Umjetnost iz izloga”, koja je imala za cilj promociju umjetnika i njihovih umjetničkih ostvarenja. Prošle godine predstavljeno je pet istaknutih članova/ica Udruženja (Ismet Berbić, Amra Zulfikarpašić, Amila Smajović, Osman Arslanagić Oma i Rebeka Abdagić).

Izložba “MOJA BiH i JA” u Centru za kulturu i edukaciju “Safet Zajko”

Izložba “Moja BiH i JA” otvorena je 29. marta u Centru za kulturu i edukaciju “Safet Zajko”. Izložbom je krunisano školsko takmičenje o temi “Moja BiH i JA” organizovano povodom Dana nezavisnosti Bosne i Hercegovine. Na takmičenju je učestvovalo preko 40 učenika sa više od 100 fotografija. Pažnja koju su dobili putem društvene mreže “Facebook” sa 28.000 pregleda i sve ukupno 7.500 lajkova bio je neočekivan uspjeh a ujedno i dokaz podrške javnosti učenicima u ovom takmičenju.

Cilj takmičenja jeste da se “oživi” takmičarski duh učenika, te pruži prilika da na kreativan način iskažu svoje viđenje i doživljaj domovine Bosne i Hercegovine. Učešće na ovom takmičenju uzeli su i učenici iz drugih zemalja. Izložba predstavlja mnogo više od domaće perspektive državljanina Bosne i Hercegovine. Na izložbi su predstavljene fotografije učenika iz Turske, Irana, Crne Gore, Ukrajine itd.



Izložba "Uloga i značaj Gazi Husrev-bega u izgradnji Sarajeva"



Povodom obilježavanja 6. aprila, Dana Grada Sarajeva u Centru za kulturu i edukaciju "Safet Zajko" održano je predavanje "Uloga i značaj Gazi Husrev-bega u izgradnji Sarajeva" profesorice dr. Ramize Smajlović. Pored predavanja, upriličena je izložba koju su pripremili uposlenici Gazi Husrev-begove biblioteke pod naslovom „Gazi Husrev-beg i njegovi hajrati - pola milenija u službi dobra“, kao i prigodnim muzičkim programom u izvedbi Mehmeda Mehića, sa pjesmom "Sarajevo ljubavi moja".

Ovom prilikom Osman Lavić, direktor Gazi-Husrev begove biblioteke, istakao je zadovoljstvo saradnjom sa Općinom Novi Grad Sarajevo, koja traje već punih pet godina.

„Ove smo godine dogovorili da povodom Dana Grada Sarajeva organiziramo jedno predavanje o Gazi Husrev-begu kao drugom osnivaču Sarajeva. Ova tema nije slučajna, ove godine se obilježava 500 godina od imenovanja Gazi-Husrev bega namjesnikom Bosne, pa smo htjeli da povežemo ta dva važna i značajna datuma u našoj prošlosti. Rijetki su gradovi u svijetu koji se mogu pohvaliti pisanim dokumentima o osnivanju svojim rodnim listovima, kao što je to Sarajevo“, kazao je Lavić.



Izložba "Sarajevo" postavljena u holu Općine Novi Grad Sarajevo

Povodom 6. aprila Dana Grada Sarajeva u holu ispred multimedijalne sale Općine Novi Grad Sarajevo postavljena je izložba pod nazivom „Sarajevo“, JU „Muzeja Sarajeva“.

Izložba "Sarajevo" je tematska, te obuhvata periode od prahistorije do najnovijeg modernog doba. Prikazane fotografije u okviru izložbe omogućavaju historijsku "šetnju" kroz Sarajevo. Za Sarajevo se može reći da je urbano, ekonomsko, administrativno, univerzitetsko i kulturno-umjetničko središte Bosne i Hercegovine. Jedinstveno je po susretu kultura i civilizacija, grad sa bogatom, burnom, ali i lijepom prošalošću. Zahvaljujući svom bogatom, duhovnom, historijskom i prirodnom izgledu, Sarajevo je grad koji ima svoje stanovnike, svoje priče, svoju prošlost ali i budućnost. Sarajevo je grad koji je daleko poznatiji od nekih većih gradova svijeta.



Polaznici lutkarske radionice odigrali predstavu "Ježeva kućica"

U Centru za kulturu i edukaciju "Safet Zajko" 15. februara održana je premijera predstave "Ježeva kućica" polaznika lutkarske radionice.

Udruženje „Spektar“, sa ciljem obogaćivanja kulturnih sadržaja na području općine Novi Grad Sarajevo, organiziralo je radionicu lutkarstva u okviru projekta „Dani kulture“, koji je podržala Općina Novi Grad.

Radionica je organizirana u dva dijela, u prvom dijelu polaznici su izrađivali lutke prema likovima iz priče za djecu, radeći pod mentorstvom akademske umjetnice Lejle Ramić. U drugom dijelu radionice, pod mentorstvom reditelja Harija Šečića, polaznici su pripremili predstavu za djecu sa lutkama. Za ovu priliku izabrana je priča „Ježeva kućica“, autora Branka Čopića, te su prema motivima iste rađeni likovi i predstava. Radionica je realizirana u toku zimskog raspusta u Centru za kulturu i edukaciju „Safet Zajko“.

Predstava je održana uz prisustvo roditelja i prijatelja polaznika lutkarske radionice, uz poštivanje higijensko - epidemioloških mjera, u skladu sa preporukama kriznog štaba Federalnog ministarstva zdravstva.



Prije 30 godina poginuo je heroj Safet Hadžić



Prije 30 godina, u odbrani domovine poginuo je heroj Safet Hadžić. Rahmetli Safet Hadžić je bio među prvim organizatorima otpora bosanskohercegovačkih patriota, koji su se usprotivili podjeli države i organizirali Patriotsku ligu Bosne i Hercegovine. Poginuo je 18. aprila 1992. godine u akciji "Pretis", kada je sa grupom patriota pokušao izvući prijeko potrebno naoružanje za odbranu grada Sarajeva od srpsko - crnogorske agresije. U to vrijeme obavljao je dužnost predsjednika Kriznog štaba Patriotske lige za regiju Sarajevo.

Polaganjem cvijeća na Centralnom spomen - obilježju kod zgrade Općine Novi Grad Sarajevo, danas je obilježena godišnjica pogibije heroja odbrambeno - oslobodilačkog rata, dobitnika najvećeg ratnog priznanja "Zlatni ljiljan" i Ordena heroja oslobodilačkog rata Safeta Hadžića i njegovih saboraca Nermina Zeljkovića, Seada Velića, Fahrudina Čavčića, Almira Islamovića i Senada Čirića.

Kod spomenika šehidima i poginulim borcima Novog Grada i spomenika dvojici heroja odbrambeno - oslobodilačkog rata sa područja Novog Grada okupili su se članovi porodice Hadžić i porodica šehida i poginulih boraca, rodbina, prijatelji i saborci rahmetli Safeta i njegovih saboraca, te predstavnici izvršne i zakonodavne vlasti.

Cvijeće su položile delegacije Općine i Općinskog vijeća Novi Grad Sarajevo, Drugog rendžerskog puka Oružanih snaga Bosne i Hercegovine, Federalnog ministarstva za pitanja boraca i invalida odbrambeno - oslobodilačkog rata, Kantonalnog ministarstva za pitanja boraca, Udruženja „Zlatni ljiljan i Zlatna policijska značka“ KS, Patriotske lige KS, PL Vogošća i PL Novi Grad, Kloordinacije boračkih udruženja Općine Novi Grad, Udruženja armijskih generala,

Komisije za obilježavanje značajnih datuma i događaja Općinskog vijeća, Općine Ilidža i političkih partija.

Safetova kćerka Amila Hadžić - Glušac, izrazila je zahvalnost što se danas priča o 30. godišnjici od pogibije njenog rahmetli babe. „Svaka godišnjica je teška i budi iznova uspomene. Ja sam bila zaista mala kad je babo preselio, tako da se i ne sjećam određenih stvari. Ali kroz sve ove godine, kroz dobre ljude sam imala priliku da ga upoznam i da budem ponosna da sam upravo ja njegova kćerka. Veliki je broj šehida koji su dali svoje živote za Bosnu i Hercegovinu i trebamo ih se sjećati“, kazala je Amila.

Načelnik Semir Efendić naglasio je značaj i doprinos koji je ostavio heroj rahmetli Safet Hadžić. „Zlatna plaketa Općine Novi Grad nosi ime po rahmetli Safetu Hadžiću, također jedna od glavnih saobraćajnica dobila je ime zbog značaja i važnosti uloge rahmetli Safeta Hadžića u odbrani domovine. Ja mogu naglasiti da je njegova borba počela mnogo ranije, obzirom da se pogibija desila na početku rata. On je bio jedan od ljudi koji su budili svijest građana o onome što će se dešavati. On je bio uvjeren i znao je, govorio je to na više mjesta, pokušavao je organizovati narod da se pripremi za odbranu. Postoje mnoge sredine u Bosni i Hercegovini gdje nije bilo takvih, gdje niko nije pripremio ljude na ono što dolazi, nažalost bila su velika stradanja i ta mjesta su završila u rukama agresora i neprijatelja. Ovdje u sredinama gdje je Općina Novi Grad i na drugim mjestima gdje je bio dovoljan broj ljudi da na vrijeme upozore ostale na ono što će se dešavati, to je značilo mnogo. Sama akcija "Pretis" bila je usmjerena na izvlačenje naoružanja kako bi se grad imao čime braniti“, rekao je načelnik Efendić.



U prepunoj multimedijalnoj sali Općine Novi Grad, 18. aprila, održana je akademija posvećena heroju odbrambeno - oslobodilačkog rata, rahmetli Safetu Hadžiću, na kojoj je premijerno prikazan dokumentarno - igrani film "Za nju vrijedi umrijeti", rediteljice i scenaristice Lejle Zvizdić, koji je publika ispratila vrlo emotivno i sa dugotrajnim aplauzom.

Film je snimljen povodom 30. godišnjice pogibije brigadnog generala Safeta Hadžića, heroja odbrambeno - oslobodilačkog rata 92-95 i dobitnika najvećeg ratnog priznanja - Zlatni ljiljan.

Tog 18. aprila 1992. godine Safet Hadžić je poginuo u herojskoj akciji "Pretis" u Vogošći, prilikom izvlačenja materijalno-tehničkih sredstava, koja su bila prijeko potrebna za odbranu Sarajeva. U akciji su živote izgubili i njegovi saborci Sead Velić, Nermin Zeljković, Fahrudin Čavčić, Almir Islamović i Senad Čirić.

Premijeri su prisustvovali predsjedavajući i članovi Predsjedništva BiH Šefik Džaferović i Željko Komšić, brojni predstavnici zakonodavne i izvršne vlasti, članovi porodica šehida i poginulih boraca Armije RBiH, predstavnici boračkih udruženja, rvi, članovi porodice rahmetli Safeta Hadžića, prijatelji i komšije.

Prije projekcije brojnim zvanicama se obratio načelnik Općine Novi Grad Sarajevo Semir Efendić, koji je ovom prilikom prisutnima poželio dobrodošlicu. Govoreći o rahmetli Safetu Hadžiću, načelnik je kazao da je on među prvima shvatio šta se dešava i šta će se dešavati devedesetih godina prošlog vijeka u BiH. "Možda je najvažnija njegova uloga bila u tome što je doprinio tome da se organizira narod na prostoru Novog Grada i Sarajeva, kroz TO, ali i na druge načine kako bi se pripremili za odbranu od agresora. Njegova borba je trajala još od 1983.godine, od "Sarajevskog procesa" i svega onoga što se tada dešavalo u BiH", naglasio je načelnik Efendić.

Prema riječima rediteljice i scenaristice Lejle Zvizdić, film je važan dokument i svjedok jednog vremena, kojim uz njene ranije dokumentarne filmove nastoji od zaborava otrgnuti historijske činjenice, događaje i heroje, te njegovati kulturu sjećanja. "Zbog položenih života za ovu zemlju mi danas nemamo pravo na šutnju i zaborav, a nove generacije na neznanje, a i to je naša odgovornost", istakla je Zvizdić.

Dugometražni, dokumentarno - igrani film "Za nju vrijedi umrijeti" kroz simbiozu bogatog arhivskog materijala i igranih scena, publiku upoznaje sa likom i djelom Safeta Hadžića i prije početka agresije

Premijerno prikazan film "Za nju vrijedi umrijeti" o liku i djelu rahmetli Safeta Hadžića



na BiH, odnosno 70-ih i 80-ih godina prošlog stoljeća, kada se suočavao sa brojnim problemima zbog gradnje džamije u Švrakinom Selu, a potom bio angažovan i u prikupljanju pomoći porodicama osuđenih u "Sarajevskom procesu". O tom vremenu svjedoče i dvojica presuđenih u ovom procesu, Mustafa ef. Spahić i Edhem Bičakčić.

Kroz privatni život Safeta Hadžića u filmu nas vodi njegova porodica, supruga Džemila, djeca Almira Hadžić - Gološ, Nezir Hadžić i Amila Hadžić - Glušac, te sestre Safeta Lagumdžija i Vahdeta Hadžifejzović. Safeta upoznajemo i kroz njegove dane djetinjstva i mladosti u rodnoj Strgačini, a određeni segmenti njegovog života su prikazani i kroz rekonstruktivne igrane scene.

Safeta u filmu igra mladi glumac Aldin Tucić, a uloge su ostvarili i Erol Horvat, Darko Petrešin, Elvedin Požega i Mahir Karović.

Inspiracija pri odabiru naslova filma "Za nju vrijedi umrijeti" bila je istoimena pjesma koju je prije nekoliko godina, upravo u spomen na njegovog daidžu Safeta Hadžića, napisao i komponovao Kenan Hadžifejzović, a izveo Hor Hazreti Hamza.

Produkciju filma potpisuje PLATFORMA. Koproductenti su Federalna TV, Reakcija i BH Telecom.

Film su podržali općine Novi Grad, Stari Grad, Novo Sarajevo, Vogošća, Trnovo, Hadžići, te JU Fond memorijala KS.



Općina Novi Grad Sarajevo

U multimedijalnoj sali Općine Novi Grad Sarajevo premijerno prikazan film "Operacija Vlašić"





Josip Pejaković

U prepunoj multimedijalnoj sali Općine Novi Grad Sarajevo 21. marta premijerno je prikazan igrano - dokumentarni film "Operacija Vlašić", autora Enesa Hotića, čije je snimanje i organizaciju podržala Općina Novi Grad Sarajevo.

Operacija "Vlašić" odnosi se na važne vojne operacije tokom rata u Bosni i Hercegovini, u kojoj su snage Armije Republike Bosne i Hercegovine (ARBiH) zauzele srednjobosansku planinu Vlašić, koja je do tada bila pod kontrolom Vojske Republike Srpske (VRS).

Film je jedinstveno djelo koje prikazuje i otima od zaborava veliku akciju oslobađanja planine Vlašić koja se desila u zimu 1995. godine. Direktni učesnici dešavanja, od generala Armije BiH do vojnika na terenu pričaju nevjerovatne priče o životu i smrti, pobjedi i porazu. Akcije "Domet 1" i "Domet 2" koje su rađene po dubokom snijegu i velikoj hladnoći ostale su neke od najupečatljivijih pobjeda Armije BiH uopšte, a svjedočenja aktera otkrivaju mnoge nepoznate detalje.

Načelnik Općine Novi Grad Sarajevo Semir Efendić obratio se prisutnima u ulozi domaćina i kazao kako je za njega velika čast i zadovoljstvo pogledati premijerno film "Operacija Vlašić" na ovaj način zajednički u ambijentu kina, upravo u Općini Novi Grad Sarajevo.

Oslobađanje Vlašića jedna od najvećih pobjeda

„Podršku smo pružili u skladu sa mogućnostima Općine Novi Grad Sarajevo za snimanje ovog dokumentarnog filma. Oslobađanje Vlašića jedna je od najvećih pobjeda Armije Republike Bosne i Hercegovine (ARBiH) i jedna od najznačajnijih pobjeda po svojoj veličini u odbrani države od agresora. Vrlo je važno da se o ovome govori. Mi smo narod koji mnogo govori o stradanju, o genocidu, ali ja vjerujem da je isto toliko važno govoriti o ovim velikim pobjedama. Mi smo ovdje u Općini Novi Grad pokrenuli mnogo toga vezano za oslobađanje platoa brda Žuč koji je za Sarajevo nešto što je Vlašić za Bosnu i Hercegovinu“, rekao je načelnik Efendić, istakavši da Općina Novi Grad Sarajevo priprema izgradnju velikog Centralnog spomen - obilježja „Kрила slobode“ na brdu Zuč, za čiju izgradnju je potpisan ugovor.

„Ja bih zaista volio da i na Vlašiću imamo veliko spomen - obilježje, da imamo filmove i čitav program manifestacija i događaja koji će nas podsjećati na herojstvo Armije Republike Bosne i Hercegovine (ARBiH) i svih onih koji su učestvovali u oslobađanju ovog krova ili kape Bosne i Hercegovine, a to je Vlašić. Svi oni koji su jednom u životu vidjeli onaj kadar na RTVBiH kada je velika zastava sa ljljanima razvijena na Vlašiću, sigurno je nikada neće zaboraviti. Ja sam jedan od tih koji je to gledao kao dijete i ostatak će mi to uvijek urezano u sjećanje“, kazao je načelnik Efendić.



Enes Hotić

Pred armijskim generalima i drugim oslobodiocima Vlašića drhtala je Banja Luka

Adnan Bajrić, sekretar "Udruženja Krajišnika" podjsetio je na historijske činjenice koje su se tematizirale kroz ovaj film i herojsku borbu u odbrambeno-oslobodilačkom ratu. „Ja sam iz porodice koja se 90-tih vratila iz Austrije i Njemačke da brani i odbrani domovinu i heroje mog djetinjstva. Ti heroji su komadanti Nanić, generali Ćuskić, Alagić, Dudaković. Jedva sam dočekao da dođem studirati u Sarajevo i da postanem sekretar "Udruženja Krajišnika", jer je to značilo da ću postati saradnik generala Ćuskića koji je bio prvi saradnik generala Alagića. Ja želim da vas podsjetim samo na jednu stvar, a to je da je Hanibal prešao preko Alpi i pred njim je drhtao Rim, a general Alagić je sa generalom Ćuskićem, komadantom Forićem i drugima oslobodio Vlašić i pred njim je drhtala Banja Luka. Mi smo ovom akcijom pokazali da nismo samo nacija koja se zna braniti, nego i nacija koja zna i pobjeđivati“, kazao je Bajrić.




Adnan Bajrić

Legendarni general Alagić je nakon oslobađanja Vlašića u svom obraćanju građanima Republike Bosne i Hercegovine rekao: „Ako je zločinac Karadžić govorio da je Vlašić kapa "srpske zemlje", mi danas s punim pravom možemo reći da smo mu skinuli tu kapu. Stvorili smo uslove za nova oslobađanja teritorija privremeno okupiranih područja BiH. A poslije kape dolazi glava. Sa Vlašića, sada krova slobodnih teritorija, idemo prema Krajini!

„Sa ove historijske distance današnje javnosti nastoji se predstaviti film sa fragmentima istine, obzirom da se radi o jednoj veličanstvenoj i impresivnoj pobjedi. Nemoguće je sublimirati svu tu tematiku iako se radi o formatu trilogije, ali ja se nadam da će ovo biti jedan od filmova nakon kojeg će uslijediti desetina drugih filmova koji će nam pokušati približiti fragmente ove veličanstvene pobjede“, kazao je Hotić.



Obilježen 6. april - Dan Grada Sarajeva, odata počast šehidima i poginulim borcima Novog Grada



Povodom 5. aprila – Dana opsade Sarajeva i 6. aprila – Dana Grada Sarajevo ispred Centralnog spomen-obilježja Općine Novi Grad Sarajevo odata je počast šehidima i poginulim borcima Općine Novi Grad. Cvijeće su položili predstavnici Općine Novi Grad Sarajevo zajedno sa općinskim načelnikom Semirom Efendićem, Općinsko vijeće Novi Grad Sarajevo, delegacija Grada Sarajevo, Koordinacioni odbor boračkih organizacija KS, boračkih udruženja Novi Grad Sarajevo, te ostale brojne delegacije i političke partije.

Načelnik Semir Efendić čestitao je građanima 6. april - Dan Grada Sarajeva, te se ukratko hitorijski osvrnuo na oslobađanje grada Sarajeva nakon završetka Drugog svjetskog rata i najduže opsade jednog grada u modernoj historiji koja je trajala od 1992. do 1995. godine. Načelnik je posebno istakao borbu građana i onih koji su svoje živote položili u čast odbrane grada Sarajeva i Bosne i Hercegovine.

„Mi smo ovdje ispred spomen-obilježja na kojem se nalaze imena blizu 2.000 poginulih boraca, šehida Armije RBiH, koji su branili općinu Novi Grad Sarajevo i Bosnu i Hercegovinu. Prilika je svakako

da se i za Dan Grada sjetimo njih, jer ne bi mi imali priliku da obilježavamo 6. april da je agresor uspio da ovaj grad zauzme, da ga pokori. Na svu sreću, zahvaljujući hrabosti, zahvaljujući jednom neviđenom i nezapamćenom otporu u moralnom, vojnom, humanom i svakom drugom smislu, Sarajevo je očitalo jednu lekciju čitavom svijetu“, kazao je Efendić.

Dodao je da je njegova želja da doživimo još mnogo rođendana Grada Sarajeva, da ono bude bolje, razvijenije, da se u njemu bolje živi, te da Sarajevo bude podstrek cijeloj Bosni i Hercegovini.

„Od glavnog grada se očekuje najviše, pa se evo nadam i želim da u budućnosti Sarajevo bude što bolji lider cijele Bosne i Hercegovine, ali da bude grad na ponos svih nas kako je to bio u svim generacijama koje su iza nas“, zaključio je Efendić.

Borci novogradskih ratnih brigada prisustvovali obilježavanju godišnjice pobjede u Çanakkalu



U Çanakkalu (Çanakkale), turskom gradu na dva kontinenta, smještenom na južnoj, azijskoj strani Dardanela, poznatom po bici na Galipolju, koja se odigrala 1915. godine, 18. marta ove godine, otkriveno je spomen obilježje za oko 20.000 Bošnjaka koji su poginuli u jednoj od najvećih bitaka dvadesetog stoljeća.

Bitka za Çanakkale (Çanakkale) ili bitka za Istanbul obilježena je i svečanom ceremonijom otvaranja jednog od najdužih mostova

na svijetu. Most "Çanakkale 1915" otvoren je na Dan sjećanja na šehide i 107. godišnjicu pomorske pobjede u Çanakkaleu koja se obilježava 18. marta.

Uz podršku Općine Novi Grad Sarajevo 50 pripadnika boračkih udruženja novogradskih ratnih brigada prisustvovalo je obilježavanju godišnjice ove velike bitke.





Godišnjica bitaka za odbranu Naselja heroja Sokolje



Godišnjica bitaka koje su se vodile za odbranu Naselja heroja Sokolje obilježena je 18. marta u organizaciji Udruženja „Druga viteška“. Učenjem Fatihe i polaganjem cvijeća na spomen - obilježju, počast poginulima odale su brojne delegacije, među kojima Udruženje „Druga viteška brigada“, Koordinacija boračkih udruženja, Općina Novi Grad Sarajevo, Općinsko vijeće Novi Grad, Ministarstvo za boračka pitanja Kantona Sarajevo, Osnovne škole „Sokolje“, Savjeta MZ, te predstavnici političkih partija, preživjeli saborci i građani.

Obilježavanju su prisustvovali i učenici OŠ „Sokolje“, koji su za ovu priliku izveli prigodan kulturno-umjetnički program. Cvijeće je također položeno Smailu Smaji Šikalo, komandiru Vojne policije 2. Viteške motorizovane brigade Armije RBiH, koji je ranjen 1. decembra 1992. godine, kod Naselja heroja Sokolje, kada ga je geler pogodio u glavu dok je pomagao ranjenom saborcu. Osam dana kasnije Smajo je preminuo.

Predsjednik Udruženja „Druga viteška brigada“, Sado Šatrović kazao je kako će ovo Udruženje nastaviti da baštini tradiciju obilježavanja ratnih dešavanja u periodu od 92-95. godine. „Trudit ćemo se da se ne zaborave uzoriti šehidi i poginuli borci 2. Viteške motorizovane brigade, ratni vojni invalidi i svi koji su učestvovali i dali doprinos odbrani naše drage domovine Bosne i Hercegovine. Ishodi bitaka koje su se odigrale za odbranu Naselja heroja Sokolje i naziv ovog herojskog naselja, govore o kakvim djelima i junačkoj borbi se radilo. Naselje heroja Sokolje je jedino naselje u Bosni i Hercegovini koje je dobilo naziv po herojima odbrane“, kazao je Šatrović.

U ovom naselju odigrale su se četiri velike bitke za odbranu naselja od agresora, 9. maja i 1. decembra 1992. godine, te 27 januara i 18. marta 1993. godine. O kakvim se bitkama radilo na Sokolju i kakvi su nadljudski naponi bili potrebni da se naselje odbrani, govorio je Sejo Čardaklija, ratni komandant bataljona 2. Viteške motorizovane brigade. „Mi smo nakon formiranja Udruženja imali misiju da na



mlađe generacije prenosimo događaje koji su se dešavali od 92-95. godine. Ako mi koji smo bili učesnici u borbi za državu Bosnu i Hercegovinu, to ne prenesemo na mlađe naraštaje, ne znam ko bi mogao drugi. Druga viteška brigada već duži period realizira projekat pod nazivom „Memorija Bosne“ sa kojim ulazimo u sve osnovne škole na području općine Novi Grad Sarajevo, gdje držimo časove i djeci prenosimo istinu o nadljudskoj borbi naših heroja i odbrani od agresora“, kazao je Čardaklija.

Pristunima se obratio i pomoćnik načelnika Službe za boračka pitanja, rad, socijalna pitanja i zdravstvo Tajib Delalić. On je kazao da Općina Novi Grad Sarajevo danas zvanično počinje provođenje Programa obilježavanja značajnih datuma, događaja i ličnosti, kojih je 33. „Ovo je dobar znak i signal, da se ovako trebaju obilježavati svi naši značajni događaji, da na ovako važna obilježavanja dolaze i borci i djeca zajedno. Borci treba da pričaju djeci šta se dogodilo u periodu od 92-95. godine, kako bi ona znala pravu istinu odbrane naše domovine od agresora“, kazao je Delalić.

Za prevenciju maloljetničkog prijestupništva iz budžeta Općine izdvojeno 15.000 KM



Budžetom Općine Novi Grad Sarajevo za 2022. godinu predviđena su sredstva u iznosu od 15.000 KM za projekte prevencije maloljetničkog prijestupništva na području općine Novi Grad Sarajevo.

Dio finansijskih sredstava u iznosu od 7.000 KM realizovat će se putem sporazuma sa sedam osnovnih škola sa područja novogradske općine, a preostali iznos od 8.000 KM u saradnji sa nevladinim organizacijama putem javnog poziva.

Ovim povodom u prostorijama Općine Novi Grad Sarajevo, jučer su predstavnici Službe za boračka pitanja, rad, socijalna pitanja i zdravstvo i Savjeta sigurnosti Općine Novi Grad Sarajevo održali sastanak sa predstavnicima osnovnih škola "Osman Nakaš", "Džemaludin Čaušević", "Mehmedalija Mak Dizdar", "Aleksa Šantić", "Ćamil Sijarić", "Avdo Smailović" i "Sokolje", na kojem je dogovoreno da škole sačine projekte čije aktivnosti će biti bazirane na kreativnim radionicama za djecu u cilju kvalitetnog popunjavanja i provođenja slobodnog vremena (likovne, dramske, literarne, muzičke, ritmičke, izrada ukrasnih predmeta i sl.).

Projekti će se realizirati i kroz edukativne radionice za djecu s ciljem osnaživanja i prevencije rizičnih oblika devijantnih ponašanja kod djece, a navedene aktivnosti će se provoditi u više sesija, koje će se implementirati do kraja školske 2021/2022. godine. Za realizaciju projekta potrebno je djeci obezbjediti i materijalno - tehničke uslove.





Podrška Općine KJU "Porodično savjetovalište"



U Općini Novi Grad Sarajevo upriličeno je potpisivanje Sporazuma o realizaciji sredstava planiranih budžetom Općine Novi Grad Sarajevo za KJU "Porodično savjetovalište" u iznosu od 5.000 KM.

Planirana sredstva će biti usmjerena za podršku realizacije programskih aktivnosti KJU "Porodično savjetovalište". Određeni iznos sredstava usmjerit će se na troškove edukacija stručnog usavršavanja uposlenika, te eventualno finansiranje troškova nabavke nedostajućeg inventara u objektu u kome ustanova obavlja djelatnost, a sve u cilju pružanja što kvalitetnije usluge korisnicima.

Tajib Delalić, pomoćnik načelnika Službe za boračka pitanja, rad, socijalna pitanja i zdravlje kazao je da je ovaj vid podrške od strane Općine Novi Grad dugogodišnja saradnja između ove dvije ustanove.

„Mi već 6 godina pomažemo KJU "Porodično savjetovalište" ne gledajući čija je to nadležnost. Mi smo se opredijelili da pomognemo ustanovama koje brinu i o našim građanima sa područja općine

Novi Grad. Smatramo da je ovo jedna vrlo važna ustanova koju smo uvijek podržavali u njihovim projektnim aktivnostima koje su se odnosile na edukacije, savjetovalište i ostale koje obavljaju u cilju pomaganja građanima", kazao je Delalić.

Aldijana Zagorac, v.d. direktorica KJU "Porodično savjetovalište" kazala je da im je ova podrška Općine Novi Grad značajna, posebno u određenim periodima njihovog djelovanja.

„Značajnu podršku Općine imali smo kada je bilo u pitanju finansiranje našeg kampa za mlade koji se odnosio na prevenciju ovisnosti o internetu. Sada kako su naše prostorije smještene u susjednoj Općini Novo Sarajevo, veliki broj korisnika upravo imamo iz općine Novi Grad", kazala je Zagorac.

Zagorac je također istakla da su sve njihove usluge dostupne svim građanima sa područja Općine Novi Grad.

Izabrano 188 novih članova savjeta mjesnih zajednica

U općini Novi Grad Sarajevo 20. marta, održani su izbori za savjete mjesnih zajednica na mandatni period 2022-2026. godina.

Od ukupno prijavljenih 566 kandidata izabrano je 188 novih članova savjeta 28 mjesnih zajednica novogradske Općine.

Pravo glasa na ovim izborima imalo je 115.257 birača, a to parvo iskoristilo je 16.682, odnosno 14,47% građana. Najveća izlaznost glasača bila je u Mjesnoj zajednici "Alipašin Most 1", MZ "Dolac", te MZ "Naselje heroja Sokolje".

Odluka o raspisivanju izbora za članove savjeta mjesnih zajednica donesena je 27. januara ove godine, na 11. sjednici Općinskog vijeća Novi Grad Sarajevo.



Za rođenje blizanaca, trećeg i svakog narednog djeteta po 500 KM za 39 porodica



Općina Novi Grad Sarajevo već sedmu godinu pruža podršku višočlanim porodicama koje dobiju blizance, troje ili više djece. 29. marta. U zgradi Općine upriličen je prijem i uručenje rješenja za dodjelu novčane podrške u iznosu od 500 KM za 39 porodica koje imaju prebivalište na području općine Novi Grad Sarajevo.

Tajib Delalić, pomoćnik načelnika Službe za boračka pitanja, rad, socijalna pitanja i zdravstvo kazao je da je ova podrška i pomoć višočlanim porodicama dugogodišnji projekat Općine Novi Grad. „Danas prvi put u ovoj budžetskoj godini dijelimo rješenja i prigodne poklone za porodilje koje su dobile blizance, treće i svako naredno dijete. Imali smo priliku da uručimo 39 rješenja. Dvadeset tri porodice su dobile treće dijete, devet porodica četvrto, jedna porodica je dobila peto, četiri porodice su dobile blizance, dok je jedna porodica dobila sedmo, a jedna osmo dijete. Posebno sam čestitao porodicama sa sedmim i osmim djetetom, tim majkama, jer nije lahko roditeljima u današnjim vremenima, kada se susrećemo sa različitim krizama. Za ovu namjenu iz budžeta je izdvojeno 110.000 KM”, kazao je Delalić.

Anja Šehovac, majka troje djece kazala je da je ovakav vid pomoći od strane lokalne zajednice veoma značajan za svaku višočlanu porodicu. „Iako sam ja zaposlena ova pomoć će mi svakako dobro doći s obzirom da imam troje djece. Smatram da je potrebno da imamo više ovakvih inicijativa, te da su one svima nama dobro došle. Ovu pomoć ćemo iskoristiti za neke potrebe za djecu ili možda čak za neko porodično putovanje”, kazala je Šehovac.





Misa za preminulog Gianfranca di Daria gradonačelnika talijanskog grada i Općine Pesaro



Sveta misa zadušnica za preminulog Gianfranca di Daria (1951. – 2020.), nekadašnjeg gradonačelnika talijanskog grada i općine Pesaro, koja je bratimljena sa sarajevskom općinom Novi Grad, slavljenja je 20. marta u župnoj crkvi Sv. Leopolda Mandića u Brijesću, koji je preminuo 2020. od posljedica zaraze koronavirusom.

Misno slavlje za sarajevskog dobročinitelja Gianfranca, predvodio je vlč. Stipica Lešić, svećenik Vrhbosanske nadbiskupije. S njime u koncelebraciji bili su: župnik mr. vlč. Josip Vajdner i direktor Nadbiskupijskog centra za pastoral mladih Ivan Pavao II. dr. vlč. Šimo Maršić.

Prisutne je na početku pozdravio župnik Vajdner te naveo nekoliko biografskih podataka o pokojniku koji je više od 20 godina neumorno radio na humanitarnom planu, kroz međunarodnu volontersku organizaciju Time for Peace – Marche. Istaknuo je kako je riječ o čovjeku koji je stipendirao veliki broj djece bez roditelja, s područja općine Novi Grad Sarajevo, te poglavito ostavio traga pomažući Osnovnu školu "Aleksa Šantić".

Vlč. Josip je u propovijedi, na temelju misnih čitanja, a u kontekstu Nedjelje solidarnosti koja se obilježava Treće korizmene nedjelje, ukazao na važnost „donošenja plodova dobra u životu“ te izgradnju mostova prijateljstva i međusobnoga razumijevanja.

Ovogodišnju molitvu za pok. Gianfranca di Daria inicirao je načelnik općine Novi Grad Sarajevo gosp. Semir Efendić, u dogovoru s prijateljima iz Italije u ime kojih je sa župnikom Vajdnerom komunicirao gosp. Stanko Radanović.



Izbor najljepše pisanice i turnir u tucanju jajima u župnoj crkvi svetog Leopolda Mandića u Briješću



Već prema tradiciji, na dan Uskrsa u najmanjoj je sarajevskoj župi održan izbor najljepšeg uskrsnog jajeta i takmičenje u tucanju jajima.

Nakon svete mise, koju je u župnoj crkvi svetog Leopolda Mandića u novogradskom naselju Briješće, na Uskrs, 17. aprila, predvodio župnik vlč. Josip Vajdner, urednik Katoličkog tjednika, održana su tradicionalna uskrsna takmičenja, izbor najljepše pisanice i turnir u tucanju jajima.

Prema "demokratskim načelima" svatko od prisutnih, koji su se okupili u župnoj dvorani, imao je pravo učestvovanja: bilo da predstavi svoje našarano jaje, bilo da bude sudionikom tucanja jajima. I svi su "tajno" glasali za najljepšu pisanicu. Nakon prebrojavanja glasova, najljepšim je uskrsnim jajetom proglašeno ono koje je uradila vjeroučenica Sara Sekulić, koja je zatim dobila simboličnu nagradu.

Poslije uzbudljivih nekoliko krugova takmičenja u tucanju, najuspješniji je bio Vedran Šutalo kojem je prigodni dar uručio prošlogodišnji pobjednik, njegov mlađi brat Josip.

Župnik je na kraju čestitao pobjednicima, te izrazio zahvalnost svima koji su učestvovali i tako dali svoj doprinos očuvanju ovog običaja, koji je, uz već postojeći tzv. Uskrsni uranak, u Briješću, postao tradicijom. Također, prenio je čestitke, koje su njemu i župljanima uputili načelnik Općine Novi Grad Sarajevo Semir Efendić, kao i brojni drugi prijatelji i susjedi različitih vjeroispovijesti.



Sezonsko cvijeće svojim raznolikim bojama krase Centar za edukaciju, sport i rekreaciju "Safet Zajko".







Općina Novi Grad Sarajevo

NOVOGRADSKI DANI 2022

24. TRADICIONALNA MANIFESTACIJA

od 1. juna do 1. jula

